

四庫全書

史部

欽定四庫全書

續資治通鑑長編卷一百六

宋 李燾 撰

仁宗

天聖六年春正月丁酉朔馬軍副都指揮使武昌節度使彭魯卒上幸其第臨奠輟一日朝贈侍中遣官監護葬事法當得諡其家避都省集官之費而固辭之庚子上謂輔臣曰大臣之喪遣官監護葬事蓋出於恩禮而

近歲喪家過有所費况祥符詔書自使相以下皆有定數今宜稍增其舊踰者令閣門御史臺金吾街仗司糾之其不願敕葬者亦聽 詔閣門祇候自今經歷邊任及中外委使者特與五年磨勘餘並具功過奏裁

辛丑契丹遣左千牛衛上將軍耶律阿果起居郎知制誥李奎來賀長寧節

己酉罷兩川歲貢乾元長寧節織成佛 詔自今南郊軍賞有關其三司官吏並劾罪以聞先是南郊賞賜軍

士而汾州廣勇軍所得帛不逮他軍一軍大譟捍守佐堂下劫之約予善帛乃免城中戒備遣兵圍廣勇營轉運使孫冲適至命解圍弛備置酒張樂推首惡十六人斬之遂定初守佐以亂軍所約者上聞詔給善帛使者至潞冲促之還曰以亂而得所欲是誘之亂也卒留不予既而上以軍賞事訊三司三司言汾州舊以淮南紬絹比折給軍士紬絹不足又令以土絕布代之故廣勇軍作亂首惡既坐誅餘悉配隸他州而降是詔

實錄載
汾州事

與孫冲傳略不
同今從冲傳

甲寅司天秋官正楊可言熒惑行近天街當犯而不犯
請付史館從之然議者謂五星凌犯見於占測非筭數
所知今日官言當犯而不犯非也

戊午詔諸路提點刑獄朝臣使臣交割本職公事與轉
運使副使仍令轉運使條所省事件以聞或言提點刑
獄官過為煩擾無益於事故也

庚申上封者言三司判官開封府推判官近歲數遷易

又多權要陳乞請自今並選有材幹而嘗更任使者為之俟二年以上方除外任監司京朝官知縣兩任為通判又兩任為知州三班使臣一任監當入監押巡檢資任太速請各增一任若有顯効及累被薦舉者令審官三班院以名聞又進士及第本以辭藝進而比來多乞賜子孫科名又閣門祇候太宗朝其負至少真宗置提點刑獄副使因詔近臣舉歷官有勞者授之其後又益舉者至七人以艱其進今權要之家比援恩例而濫進

者多請一切罷之諸路走馬承受歲滿當除閤門祇候止與遷一官並從之仍著為令

癸亥免河北州軍災傷人戶夏秋稅折變一年詔天下應在官物令諸路轉運使選所部同判或幕職官期三年內悉除之百萬以上歲中除十之八者升陟不及百萬而歲中悉除者錄其勞過期者劾罪以聞

甲子建州觀察使康繼英請以南郊所加恩回贈其祖再遇一官詔優贈之

二月辛未以知揚州祠部員外郎杜衍為刑部員外郎
先是衍提點河東路刑獄寧化軍守將鞠人死罪不以
實行復正之守將不伏訴於朝詔為置獄果不當死於
是有司言法當賞衍特遷之 宰臣王曾等言真宗忌

自大祥後禁刑不視事前後各三日禁樂各五日然歲
月漸遠禮有可殺之文詔自今禁刑不視事各兩日禁
樂各三日 詔太常寺四郊齋官常行視完葺之少府
監祠服遣吏齋赴祠所以給祠官光祿寺進服令監祭

使封題同進 判太常寺孫奭言皇地祇等十八壇皆有外壝而南郊獨無樵牧之人徑至壇下有瀆嚴恭按圓設三壝今請築外壝仍於壝外築短垣四面各置櫺星門俟皇帝親郊則以青繩柱表其三壝以合郊丘之制從之 同知禮院王皞言諡者行之表也善行有善諡惡行有惡諡蓋聞諡知行以為勸戒六典太常博士掌王公以下擬諡皆迹其功德而為之褒貶職事官三品以上散官二品以上佐吏錄行狀申考功下太常擬

諡訖申省擬定聞奏近日臣僚薨卒雖官品合該擬諡其子弟自知父祖別無善狀慮定諡之際斥其繆戾皆不請諡竊以諡法自周公以來垂為不刊之典蓋以彰善癉惡激濁揚清使其身歿之後是非較然用為懲勸今若任其遷避則為惡者肆志而不悛欲乞今後凡有臣僚薨謝不必候本家請諡並令有司舉行如此則隱慝無行之人有所沮勸若謂須佐吏錄行狀申乞方行擬諡臣略觀方冊別無明證惟春秋衛公叔文子卒其

子戌請諡於君曰日月有時將葬矣請所以易其名者
謂春秋之時周德下衰於是禮壞樂缺公叔之卒有司
不能明舉舊典故致將葬始請諡於君且周制太史掌
小喪賜諡小史掌卿大夫之喪賜諡讀誄以此知有司之
職自當舉行明矣又言兄弟同朝如遇覃恩俱該封贈
父母除中書樞密院外乞許令列狀陳請仍於告身具
列兄弟職位特比常例優與推恩詔並從之

據會要
論諡法及

論封贈皆在五年十月今並從實錄蓋
峰所論先下禮院乞如所請施行故也

降內園副使

王世融為內殿承制監號州稅初世融女嫁東頭供奉
官承詔不相能世融託妻病奏詔承詔過其家被酒乃
與三子毆之法寺議世融上書詐不實當追官勒停上特
寬其罪亦勒承詔朝叅承詔德鈞子世融承衍子也

甲戌詔永興軍涇陽知縣兼管勾三白渠先是都官貲
外郎監正陽鎮酒稅李同言三白渠宜立約以限水因
擢同知縣而有是命

丁丑詔上御藥供奉藍元用張懷德羅崇勲並落供奉

為上御藥

戊寅上謂輔臣曰登州採金歲益數千兩其官吏宜降詔褒諭王魯對曰採金既多則農民皆廢業而趨利不當更誘之上曰誠如所言然官吏勤事亦不可不勸也庚辰大風晝暝甘州可汗王寶國伊魯格勒遣使貢方物

壬午工部尚書平章事張知白卒知白在相位惜名器無毫髮私常以盛滿為戒雖顯貴其清約如寒士然體

素羸憂畏日侵在中書忽感風眩輿歸第帝親問疾已不能語卒為罷社燕贈太傅中書令太后臨奠之其家以貧辭敕葬詔送終之具悉從官給且諭王魯等令共恤其家禮官謝絳議諡文節御史王嘉言以為絳止因車駕臨問覩其寢處儉素為之動容乃引好廉自克為諡似略其大而錄其小以知白守道徇公當官不撓可謂正矣請諡文正王魯曰文節美諡矣遂不改嘉言禹偁子也或言知白與虞部負外郎楊儔者善自西川罷

歸知白欲令審官先與除授曾不可曰百執事釐務自有次序儔安可先也未幾曾以疾謁告叅知政事魯宗道迎知白意議先與儔官知白忻然從之後宗道乃對上發其事知白驚惋自失退而引咎謝曾因之抑鬱數月而沒故知白不喜宗道常語人曰銓曹中取一最人材選人軍巡獄中求一最無行者亦當優於此人矣先與

揚儔官據王子融言行錄惡魯宗道據子融百一編然知白素號賢相宗道亦雅有直聲恐未必爾也更須參考之

丙戌詔江淮鹽糧綱卒歲一代之每歲十一月放還營
至春如舊

丁亥益州路轉運使狄棐言雅州地僻請如維茂黎三
州例舉本路知縣人為知州從之

去年六月

辛卯上諭三司曰太平興國寺太宗所建歲久隳摧其
以諸塔廟所施錢亡僧衣鉢增葺之 開封富民陳氏殺
傭作者而誣以自經死事覺輒逃匿不獲判官侍御史
李應言指其豪橫結權要請嚴捕之壬辰出應言知河

陽而事遂緩應言尋徙壽州

慶歷三年七月李應言有附傳但無邑里

定

王府記室參軍刑部郎中康孝基言前後宮僚例帶館

職望稽典故俾登深嚴

會要六年二月二十六日事實錄不載孝基自陳

癸巳命知制誥徐奭龍圖閣待制孔道輔除放三月欠

負詔乾元長寧節禁決大辟前後各二日餘罪惟正

節日權停

甲午雄州言民妻張氏戶絕田產於法當給三分之一

與其出嫁女其二分雖有同居外甥然其估為緡錢萬

餘當奏聽裁上曰此皆編戶朝夕自營者毋利其沒入
悉令均給之宰相王魯參知政事呂夷簡魯宗道咸贊
曰非至仁何以得此也

三月丙申朔日有食之

辛丑詔陝西河北京西民困災傷流移者免所過渡錢
壬寅召輔臣崇政殿西廡觀侍講孫奭講尚書

戊申太后幸贈侍中劉美第左司諫劉隨奏疏勸止太

后納其言自後不復再駕

此據宋初所作隨墓銘傳云太后不宜數幸外家恐誤也

今改之

已酉京西轉運使楊嶠言澶州浮橋用船四十九隻自
温州歷梁堰二十餘重凡三二歲方達澶州請自今於
秦隴同州伐木磁相州取鐵及石炭就本州造船從之
嶠礪子也

辛亥詔歲調鄆曹濮等州丁夫以治澶州河堤頗妨農
業自今發鄰州卒代之 又詔河北緣邊安撫司契丹
歸明人嘗授偽官者勿留 追號江南處士史虛白為

冲靜先生虛白有高節善屬辭五代亂離隱居巖谷李氏累聘不起至是其孫虞部負外郎溫已以虛白文集來上特追旌之

張知白既卒上謀所以代之者宰臣王魯薦呂夷簡樞密使曹利用薦張士遜太后以士遜位居夷簡上欲用之曾言輔相當擇才不當問位太后許用夷簡夷簡因奏事言士遜事上於壽春府最舊且有純懿之德請先用之太后嘉其能讓士子樞密副使張士遜為禮部尚

書平章事從利用之言也曾加吏部尚書利用改保平節度使進封鄆國公張耆改泰寧節度使封岐國公叅知政事呂夷簡加戶部侍郎魯宗道加禮部侍郎樞密

副使夏竦加給事中

王曾曹利用薦相見江氏雜志又據馮氏御史臺記張知白既卒月

餘王曾留身議命相后欲用士遜且言士遜位夷簡上曾曰相當以才昇不以位次后許用夷簡是日晚兩府復奏事夷簡因留身讓士遜后卒相士遜今參取二書

癸丑以右諫議大夫知永興軍姜遵為樞密副使遵長於吏事其治尚嚴猛所誅殘者甚衆時人號為薑擦子

太后遣內侍曾繼革於永興軍營浮屠遵希太后旨悉毀漢唐碑碣以代甄甓而又佐繼革躬自督治既成乃得召用云繼革尋死於塔所人謂鬼誅之也

丁巳詔諸河押運殿侍犯杖罪令轉運發運司依三軍大將例勘決施行

戊午以試中身言書判掌禹錫等八人為京官餘六十四人第遷如故事禹錫鄜城人也

己未龍圖閣直學士右諫議大夫權三司使公事范雍

為樞密副使仍班姜遵之上

辛酉以樞密直學士右諫議大夫知益州薛奎為龍圖閣直學士權三司使公事右諫議大夫權御史中丞程琳為樞密直學士知益州成都歲市布織繅數十萬以給秦隴軍用吏多隱剋為姦奎令民自相保任預貸其直以期會輸官民便之有掘地得偽蜀時中書印者貯錦囊中夜挂城西門閣吏晨取以白從而觀者以萬計皆恟恟以為異奎顧主藏吏藏之略不取視民婦訟其

子不孝詰之乃曰貧無以為養奎出俸錢予之戒曰若復失養吾不貸汝矣其子母遂如初上元然燈與僚吏夜燕佛寺有戍卒殺人於市市人皆奔走奎密遣捕殺之坐客莫有知者其臨事持重明決多類此

壬戌詔於順天門外八角鎮建西太一宮司天言五福太一在黃室宮吳越分凡四十五年今當自黃室宮趨黃庭宮梁蜀分故也

夏四月丙寅朔降詔恤刑上因謂輔臣曰天久不雨天

下刑獄其有枉濫乎卿等不可不察也

戊辰詔審官三班院吏部流內銓軍頭司各引對公事
自帝為皇太子輔臣叅決諸司於資善堂至是始還有
司

庚午詔審官三班院吏部流內銓磨勘人並前一日具
歷任功過進內候批出方於崇政殿引對仍令主判官
看詳有合覆奏者先奏聽裁 邕州七源州權寨主三
班借職李緒與交趾戰死錄其子和為三班借職李公

蘊雖遣李公顯來入貢又令其子弟及壻申承貴率衆
內寇也

壬申知瀘州宣州觀察使駙馬都尉李遵勉辭置酒長
春殿故事觀察使辭不置酒特寵之 詔河北緣邊先
落蕃人有來歸者量給錢使還故里

丙子契丹遣安東軍節度使耶律錫利州觀察使劉雙
美來賀乾元節

丁丑遣開封府推官監察御史王沿左侍禁閤門祇候郭

立往河北災傷州軍體量安撫降敕榜逃戶歸業者免
今年田稅官為貸種食縣鄉毋得追擾其邢趙滄瀛懷
衛等州民飢尤甚亟發廩賑救之

戊寅詔渭州鎮戎軍新招弓箭手涅其左手背以別之
仍給新開壕內田歲所收租半予之餘充本處公用又
詔鎮戎軍原渭州蕃落指揮近升為禁軍其依廣銳勁
勇軍例官給錢市馬

此段只須記涅手背恐
是事始不然并可削去

庚辰除潞州民食鹽錢 析鄆州張秋埽為三百步埽

增巡護使臣一員三百步其地名也

癸未命龍圖閣待制燕肅直史館康孝基同議蠲減三
司歲所科上供物凡中都歲用百貨三司視庫務所積
豐約下其數諸路諸路度風土所宜及民產厚薄而率
買謂之科率諸路用度非素蓄者亦科率於民然用有
緩急物有輕重故方上所須輕者反重賤者反貴而民
有受其弊者肅等既受命建言京師庫務所積可給二
年者請勿復科買詔從之後下赦書數以為言

勿復科
買在九

月乙未今
并書之

甲申旦有星大如斗自北流至於西南光照殿庭有聲如雷尾長數丈久之散為蒼白雲

乙酉鹽鐵判官太常博士直史館蕭貫為京東轉運使時提舉捉賊劉舜卿者善捕盜號劉鐵彈恃功為不法前後畏其凶悍莫敢治貫至發之廢為民

丙戌改新知永興軍胡則為陝西都轉運使涇原路鈐轄兼知渭州劉平自言則丁謂之黨臣與謂有隙今隸

則部慮拮據致罪詔徙平知汝州然則亦竟不赴陝西也

戊子以星變命輔臣分詣寺觀禳祈

庚寅德音以星變齋居不視事五日降畿內囚死罪流以釋之罷諸土木功賑河北流民過京師者時命僧道禴禳於文德殿殿中侍御史李紘奏曰文德殿布政會朝之位每災異輒聚緇黃讚唄其間何以示中外

右司諫劉隨因星變言國家本支蕃衍而定王之外封

策未行望擇賢者用唐故事增廣嗣王郡王之封以應祖宗意 監察御史鞠詠條上應變五事又言太子少保致仕晁迥雖老而有器識宜蒙訪對其必有補

五月丙午熬屋縣尉孫周翰杖脊刺配廣南牢城坐因市物決人至死也

丁未詔權停貢舉

庚戌詔溫鼎廣等州歲貢柑不得以貢餘為名餉遺近臣始王曾言於上請斷貢餘上曰貢且勞矣況其餘乎

亟命罷之

樞密副使姜遵言咸陽民元守亮歲貢梨朝廷給賜常倍其直守亮族素豪每恃此誇其里中因以凌弱請絕

其獻上曰朕不知守亮敢恃此以橫也辛亥詔罷之

自遵

長安入樞府乃言此事本傳載於未召用前蓋誤今從實錄及寶訓

贈禮部尚書謚安惠

周起卒

壬子知青州李廸請以泰寧節度推官劉顏為青州觀

察推官從之

乙卯河北京東蝗

丁巳以樞密直學士工部侍郎李及為御史中丞及時知河南召用之杜衍提點京西路刑獄及與衍會為具甚踈薄他日中貴人用事者至亦無加品衍歎其清德及妻張氏性悍妬及嘗生子鞠之外舍張固請保養之一日會親屬以子擊堂柱碎其首及遂無子

記聞章獻太后臨朝

內侍省都知江德元權傾天下有弟德明奉使過杭州時李及知杭州待之一如常時中人奉使者無所加益僚佐皆曰江使者之兄居中用事當今無比榮枯大臣如反掌爾而使者精銳復不在人下明公待之禮無加

者意者明公雖不求福獨不畏其為禍乎及曰及待江
使者不敢慢亦不敢過如是足矣又何加焉既而德明
謂及僚佐曰李公高年何不求一小郡以自處而久居
餘杭繁劇之地豈能辦邪僚佐走告及曰果然使者之
言甚可懼也及笑曰及老矣誠得小郡以自逸庸何傷
待之如前一無加既而德明亦不能傷也時人服其操
守按及以乾興元年三月知杭州天聖元年九月徙南
京在杭州才一歲餘不當云久居此蓋誤也今不取
樞密院請擇諸班之識字者以備邊吏之闕得內殿直
都知任冝等十人已未授冝作坊副使餘皆優擢之

廣南西路轉運使言交趾入寇已令都同巡檢領兵及
發溪洞丁追取所略戶口詔如不盡還所略即與邕州

知州會兵討捕之時文思使焦守節知邕州遣人入交

趾諭以利害公蘊拜章謝

守節事附見

賜光祿寺丞集賢

校理李淑進士及第時淑預修史同修史官劉筠等列奏淑夙負詞學時稱俊敏召試學士院策論甚優而有是命

六月丙寅除戎瀘等州穀稅錢

新汾西縣令雄文雅言父永昌縣尉可則先沒於王事乞納所除縣令回贈之丁卯贈可則大理寺丞文雅除

縣令如故 賜延州修城平川寨役卒緡錢

戊辰以契丹故沃野縣主簿楊從簡為北海縣主簿從簡安德人嘗舉明經後并其母陷契丹以本科及第至是挈族來歸而父無恙上矜而錄之 周虢州刺史柴

貴世宗弟也其孫肅自陳求官上問王魯曰肅果柴氏之後乎魯對曰得貴告身驗之信然上曰世宗開拓土

宇為吾國家也後裔其可忘哉命為三班奉職

寶訓既有肅名

又有元亨名今但依實錄存肅名當考

寧州防禦使李允則卒允則自

雄徙鎮又自鎮徙潞在河北前後踰二十餘年事功最多其方略設施雖寓於遊觀亭傳間後人亦莫敢隳至於國信往來費用儀式多所裁定晚年居京師漢人有自契丹亡歸者皆命舍允則家允則既死始寓樞密院大程官營

甲戌賜防河卒衫袴其後率以為常

率以為常
據本志

己卯廣西轉運司言靜海節度使同平章事安南都護南平王李公蘊卒諸子爭立乞增飭邕欽廣三州兵備

詔桂宜等州巡檢都監領所部兵於近界防扼事定即還

乙酉出內藏庫緡錢二十萬下京西轉運司市糶軍儲
丁亥以太常丞直史館馬季良為龍圖閣待制先是太
后欲擢季良侍從王魯難之會魯移疾太后諭中書令
亟行除命執政承順且遽故季良止以三丞充待制蓋
三丞未有預內閣清職者朝論譁然益重魯之守正云
己丑追復太常少卿戚綸為左諫議大夫綸以責死天

禧間其子舜舉上綸平生奏議詔復之 詔光州權置
通判一員以武臣石普知州故也

秋七月甲午朔淮南江浙荆湖制置發運副使張綸領
昭州刺史前淮南轉運使主客郎中胡令儀為金部郎
中捍海堰成故有是命

四年八月丁亥初修堰

乙未詔翰林院自今醫學祇候嘗有過者及十年毋得
還 開封府監察御史王沿為河北轉運副使沿上言
本朝制兵刑未幾於古自北人通好三十年二邊常屯

重兵坐耗國用而未知所以處之請教河北強壯以代
就糧禁卒之闕罷招廂軍以其冗者隸作屯田行之數
年常漸銷滅而強壯悉為精兵矣古者刑平國用中典
而比者以敕處罪多重於律律以緡直代之律坐髡鉗
而役者敕黥竄以為卒比諸州上言謫卒太多衣食不
足願勿復謫者七十餘州以律言之皆不至是以繁
文罔之而寘於理也誠願削深文而用正律以錢定罪
者悉從緡估黥竄為卒者止從髡鉗此所謂勝殘去殺

無待百年者也

此疏附見不必在
初除漕時當考

己亥度支副使工部郎中唐肅為契丹后生辰使內殿
承制閣門祇候葛懷敏副之

乙巳以戶部判官左司諫劉隨知濟州隨在諫職前後
所論甚衆帝既益習天下事而太后猶未歸政隨請軍
國常務專稟帝旨太后不悅會隨請外因命出守 賜

延州城平川新置寨名曰承平 內園使連州刺史知

代州劉文質卒詔厚賻其家錄其三子渙為將作監主

簿滄為三班奉職濬為借職文質以簡穆親又父死事故前後賜與異諸將真宗嘗問保塞之舊文質上宣祖太祖賜書五函上亦五以書賜之然性剛喜評刺短長於貴近無所遜故不大顯

此據正傳正傳亦采蘇舜欽所為文質墓銘

壬子江寧府楊真潤三州並言江水溢壞官私廬舍

甲寅遣度支判官太常博士直史館高饒西頭供奉官閣門祇候劉永証為江淮兩浙體量安撫其因水損失官物悉具數以聞被溺之家三口以上給錢二千不及

者半之

丙辰以翰林學士兼侍讀學士蔡齊為龍圖閣學士知河南府羅崇勲趣齊上修景德寺記曰參知政事可得也齊故遲其記不上崇勲怒譏於太后命齊出守參知政事魯宗道固爭留之不能得尋以親老易密州太后諭宰相取記齊上之命內侍蔡齊卿等存問江淮兩浙水災州軍人兵被溺之家不能收殮者官為瘞埋之詔高餽等所至毋得燕遊及令官吏送迎重為煩擾時杜

行在揚州營護有勞州人懷之使者還對見未及他語
太后問杜衍安否使者以治上對太后歎曰吾知之久
矣 賜樞密使張耆常樂坊第一區

辛酉監察御史王嘉言言信州民程尚獻石綠末青二
萬五千兩助修在京護國禪院遂得免徭役竊恐四方
之民競緣貢獻而致僥倖漸不可止詔程尚但免役二
年 開封府言有民馮懷信嘗放火其妻力勸止之他
日又令盜摘鄰家果不從而脅以刃妻懼告夫准律告

夫死罪當流而懷信乃同日全免上曰此豈人情耶乃詔懷信杖脊刺配廣南牢城其妻特釋之

壬戌知制誥徐奭等言詳定三司欠負凡放二百三十六萬

是月雄霸州大水 命駕部員外郎閻貽慶等浚廣濟

河

此據會要
七月事

八月癸亥朔賜河北修河防城役卒緡錢

甲子省澧州同判一員

乙丑詔河北水災州軍免今年秋稅初上謂輔臣曰比
令內侍往緣邊視水災如聞有龍堰於海口故水壅而
不泄可遣官致祭王魯曰邊郡數大水蓋洪範所謂不
潤下之證海口恐非龍可堰也宜寬民賦以答天災故
有是詔

丙寅戶部副使度支員外郎王駿為河北緣邊水災州
軍安撫使六宅使康州刺史劉承顏副之積水害民田
處令日具增減以聞民轉徙他州者免所過稅諸繫囚

與長吏從輕遣決官吏貪暴者劾之

己巳祠部員外郎直集賢院丁度為京西轉運使司天

言永昌陵有白氣請改築以厭不祥詔度按視度奏神

道貴靜陵廟事大不可用術者言輕議增損乃止

永昌陵白

氣恐自有時日則此條不必載

屯田員外郎陳貫知涇州督察盜賊

禁戢不肖子弟簿書筦庫賦租出入皆自檢覈嘗謂僚

屬曰視縣官物如己物容有姦乎州人憚其嚴於是徙

為利州路轉運使會歲飢自以職田粟賑飢者又率富

民令計口占粟悉發其餘所活幾萬餘人詔書褒諭
上復命殿中丞陳執中為右正言壬申以執中知漢陽
軍復官才五日也天禧中曹利用壻盧士倫除福建轉
運使憚遠不即行利用為請乃改京東執中時在言職
嘗劾奏之及是利用方用事言執中資淺宜試治民乃
命出守

甲戌淮南江浙荆湖制置發運使文思使昭州刺史張
綸知秦州綸天禧末為發運副使時鹽課積虧者十年

綸乃奏除通泰楚三州鹽戶宿負官助其器用鹽入優與之直由是歲增課數十萬復置鹽場於杭秀海三州歲入課又三百五十萬居三歲增上供米八十萬在江淮踰六年為民興利除害甚衆性喜施與漕卒多凍餒道死者綸見之歎曰此有司之過非所以體上仁也推俸錢市絮襦千數衣其不自存者

乙亥澶州言河決王楚埽凡三十步

李璣十朝綱要發夫卒塞之

丁丑三佛齊國王室離疊華遣使蒲押陀羅歇及亞加

廬等來貢方物舊制蕃國使入貢賜以間金塗銀帶時特以渾金塗帶賜之

戊寅翰林學士承旨兼龍圖閣學士劉筠以龍圖閣學士知廬州筠三入翰林意望兩府及為承旨頗不懌嘗移疾不出或戲筠曰服清涼散必愈蓋兩府乃得用青涼傘也筠前嘗知廬州愛其土遂築室城中駕閣藏前後所賜書上為飛白書曰真宗聖文祕奉之閣及再至即營冢墓作棺自為銘刻之後三歲竟卒於書閣筠初

為楊億所識拔後遂與億齊名時號楊劉性不苟合臨
事明達而其治尚簡嚴然晚為陽翟同姓富人奏求恩
澤清議頗少之 樞密直學士給事中寇瑊為契丹生

辰使內殿崇班閣門祇候康德與副之殿中侍御史判
三司開拆司朱諫為正旦使供奉官閣門祇候曹榮副
之開封府判官殿中侍御史張逸為契丹后正旦使左
侍禁閣門祇候劉永釗副之榮仍改名英

英改名當
是避契丹

諱更
考之

甲申詔錢惟演以下至御史知雜五十五人舉殿直以上材武方略曉邊事者各一員其未歷親民及兩府親戚走馬承受閤門祇候者毋得舉

晏殊之出也上意初不謂然欲復用之會李及卒乙酉召殊於南京命為御史中丞仍令班翰林學士上唐中書令張九齡九代孫錫以九齡告身及明皇批答來獻上謂輔臣曰九齡唐名相也宜旌其後即授試國子四門助教王魯曰安祿山反狀未萌九齡獨先見請誅

之明皇不聽及祿山反乃自蜀遣使致祭於曲江雖悔無及也今錄其後足以勸忠矣

丁亥詔審官院選官知真楚泗三州 賜南京修溝河役卒緡錢 樞密院言諸軍將校中頗有因循不能禁戰軍士者欲召殿前馬步軍副指揮使楊崇勲夏守贇等密令體量具名以聞別取進止時將轉負故也

九月壬辰朔省廣桂二州幕職官各一員

丙申河北轉運使王沿言乾寧信安軍霸州公人逃去

者隨輒差人水災之後重困於民請俟歲豐如舊從之
己亥詔近制京朝官三任知縣入同判又三任入知州
自今任內嘗有五人同罪奏舉者減一任

辛丑西太一宮成

壬寅免雄霸等州被水家蒲魚稅錢 詔審官院選官
知興元府及利州

癸卯幸西太一宮

甲辰詔河北災傷民嘗以桑土倚質與富人者悉歸之

候歲豐償所貸錢

乙巳詔河北城壁為水摧圯天下州軍器械久不繕完者其遣使臣十七人往諸州提點修葺之河北即委轉運使巡所部舉行

丙午太常少卿直昭文館陳從易為左司郎中兵部郎中集賢院修撰楊大雅並知制誥自景德後文士以雕靡相尚一時學者鄉之而從易獨自守不變與大雅特相厚皆好古篤行無所阿附天禧初大雅提點淮南刑

獄循江按部過金陵境上遇風舟覆得榜卒拯之及岸
冠服盡喪時丁謂鎮金陵遣人遺衣一襲大雅辭不受
謂以為歎王欽若為宰相亦不悅之朝廷欲矯文章之
弊故並進從易及大雅以風天下大雅初名侃以犯真
宗藩邸舊諱詔更之

按寔錄從易大雅蓋與度支判官
右司諫直史館同修起居注張觀

三人者並為知制誥今但從
正史載二人事迹削觀不著

戊申御崇政殿閱諸軍轉負凡三日

庚戌詔御書院待詔出職者自今不得為文資

癸丑以才人張氏為美人時張氏已被疾後五日卒

益州鈐轄劉承顏言商旅入川無公憑者多由葭萌私路往請如劔門置關仍令逐處給公憑至者察驗之詔從其請 詔天下酒場利薄歲課不及百緡者自今勿復增課從御史中丞晏殊之請也

冬十月壬戌朔析荆湖北路安州京西路先是京西轉運使言本路供億費多而賦入少故有是請從之

戊辰進封乳母南康郡夫人林氏為蔣國夫人

壬申都大巡檢汴河堤岸康德興言行視陽武橋萬勝
鎮宜存斗門其梁固斗門三宜廢去祥符界北岸請為
別竇分減溢流悉從其請勾當汴口王中庸請增置孫
村石限亦從之

此據本志志但云勾當汴口康德興明年乃為都巡檢與實錄異今官名從實

錄

癸酉詔開封府以太宗真宗尹京日所判符牒上禁中
河北轉運司言天下場務歲課三千緡以上者請差使
臣監臨上謂輔臣曰歲入不多而增官得無擾乎甲戌

詔歲課倍其數乃增使臣

丁丑詔武臣毋得補富民為教練使衙內知客子城使

其隨行人聽補

會要於五年十月載臣僚申請差詳今但從實錄

癸未貶知鄆州考功郎中杜堯臣為濟州團練使堯臣性殘酷其下被箠扑死者甚眾市物郡內虧價假富民車牛輦瓦木以營私第故貶之

甲申除福州官莊錢初王氏據福州時有田千餘頃謂之官莊自太平興國中授券與民耕歲輸賦而已天聖

二年發運使方仲荀言此公田也鬻之可得厚利遣屯田員外郎辛惟慶領其事凡售錢三十五萬餘緡詔減緡錢三之一期三年畢償監察御史朱諫以為傷民不可詔復為貧弱者寬期既而期盡未償者十二萬八千餘緡知州事章頻具以聞上曰遠方民貧而官司督責甚苦其悉除之

頻傳數不同又載事不詳首尾實錄亦然今取本志及會要增修之

乙酉罷河北緣界河買撲酒稅名額

十一月壬辰免雄州歸信容城縣兩地供輸人戶為衙

前軍將

庚子詔陝西部署司緣邊蕃部使臣首領等因罪罰羊並令躬自送納毋得却於族下科斂入官犯者重斷之壬寅三司言巡捉私鑿其賞罰請如私茶鹽法從之詔如聞京草場受納民輸多有邀滯宜令三司開封府遣判官推官各一員日詣場檢視但堪秣馬速受之癸卯翰林學士宋綬等上所撰天聖鹵簿記十卷初郊祀綬攝太僕卿陪玉輅帝問儀物典故占對辯給因使

綬等集官撰記帝歎其詳備詔等第賜物 益州獻異
花似桃四出而千百苞駢聯成朶蜀耆舊言此花不開
六十餘年矣上頗異之後因目為太平瑞聖花

甲辰詔審官院蔭補京朝官監當及八年而無私罪者
不以課利增虧與親民

乙巳廢福州連江羅源寧德長溪四縣官煎鹽場以鹽
田賦貧民

癸丑太常博士集賢校理聶冠卿言天下奏狀雖杖笞

並申覆而徒流非繫獄者乃不以聞非所以矜恤刑罰之意請自今罷覆杖笞罪自徒以上雖不繫獄亦附奏從之

丁巳奉安太一神像於西太一宮宰相張士遜為奉安使

是月京西言穀斗十錢以故太尉王旦孫三班奉職恪為無料錢京官從旦子雍所陳也

十二月癸亥幸西太一宮

甲子以大理評事范仲淹為祕閣校理初仲淹遭母喪
上書執政請擇郡守舉縣令斥遊惰去冗僭遴選舉敦
教育養將材實邊備保直臣斥佞人使朝廷無過生靈
無怨以杜姦雄凡萬餘言王魯見而偉之亦知仲淹乃
晏殊客也於是殊薦人充館職魯謂殊曰公實知仲淹
捨而薦此人乎已為公置不行宜更薦仲淹也殊從之
丙寅廢西京洛陽馬監

丁卯賜故杭州處士林逋謚曰和靖先生仍賜其家米

五十石帛五十匹逋臨終賦詩有茂陵他日求遺藁猶喜曾無封禪書之句既卒州以聞上嗟惜之故有是賜初逋嘗客臨江李諮方舉進士未有知者逋謂人曰此公輔器也及逋卒諮適為州守為素服與其門人臨七日葬之刻遺句納壙中

已已詔審刑院自今舉嘗參官曾歷在京刑法司者為詳議官大理詳斷官刑部詳覆官法直官舉幕職州縣官看法令者為之

壬申右諫議大夫權判吏部流內銓胡則坐失保任降
為太常少卿知池州

戊寅御史中丞晏殊言諸州都監都巡檢閣門祇候及
內殿崇班以上嘗為公人僕隸者自今毋得與舊所事
官接坐若職事相關即移徙他州其三班使臣以下監
臨物務者並聽公參從之

辛巳上封者請稅緡錢以助經費上曰貨泉之利欲流
天下而通有無何可算也不許

癸未除應天府書院地基稅錢

乙酉契丹遣保安軍節度使耶律遂英衛尉少卿王承錫來賀太后正旦

丙戌遣彰聖軍節度使蕭素石千牛衛大將軍馬保永來賀正旦

丁亥詔自今京朝官選舉人家狀內合具本貫外其寄貫別州者仰更朱書某州軍

戊子詔汴口清河卒月給錢三百

是月詔所差諸路走馬使臣多不得人宜令三班院自
今選曾有臣僚同罪奏舉及曾經兵馬監押或巡檢寨
主知縣不曾犯賊私罪者充 廣濟河導河水自開封
歷陳留曹濟鄆其廣五丈亦名五丈河是歲駕部負外
郎閻貽慶言河出濟州之合蔡鎮通梁山泊近者大河
決蕩溺民田壞河道由合蔡而下漫散不通舟請治夾
黃河引水注之因敕貽慶與勾當溝河李守忠同京東
轉運使度工費立橋梁置埧堰踰年而畢遷貽慶官凡

所更縣委令佐專察護淺則濬治岸薄而圯則增築之
植榆柳為固而輦運使總按其不如法及幹績而可紀
者濬廣濟河據會要在天聖六年十月而本志不書月
合依會要附七月未熙寧七年十月三日復浚廣濟
河



欽定四庫全書

史部

續資治通鑑長編卷一百

七至十

詳校官檢討臣劉錫五

刑部郎中臣許兆椿覆勘

纂修官總令修御史臣鄒玉藻

謄錄監生臣俞錫玉

欽定四庫全書

續資治通鑑長編卷一百七

宋 李燾 撰

仁宗

天聖七年春正月乙未契丹遣伊勒希巴左千牛衛上將軍耶律漢寧少府監劉湘來賀長寧節

庚子命供奉官閤門祇候曹用和往滄德州規度河隄
壬寅三司言江淮發運使歲漕上供米六百萬石前詔

權減五十萬今歲豐請復如舊詔更一年復之

癸卯樞密使曹利用罷以保平節度使守司空檢校太師兼侍中判鄧州初太后臨朝威震天下中人與貴戚稍能軒輊為禍福而利用以勲舊自居不卹也凡中降恩力持不予左右多怨太后亦嚴憚利用稱侍中而不名利用奏事簾前或以指爪擊帶鞞左右指以示太后曰利用在先帝時何敢爾耶太后頷之利用奏抑內降恩或屢却而復下則有僂俛從之者久之人測知其然

或紿白太后曰蒙恩得內降雖屢却于樞密院今利用之家媼陰諾臣請其必可得矣下之而驗太后始疑其私頗銜怒內侍羅崇勲得罪太后使利用召崇勲戒敕之利用去崇勲冠幘詬斥良久崇勲恥恨會利用從子訥為趙州兵馬監押而州民趙德崇詣闕告訥不法事奏上崇勲方侍自請往按治乃詔龍圖閣待制王博文監察御史崔暨與崇勲鞠訥于真定府即罷利用樞密使制辭猶以利用累章請外為辭利用既受命請對不

許而崇勲等窮探其獄獄具汭坐被酒衣黃衣令軍民
王旻王元亨等八人呼萬歲且傳致汭辭云利用實教
之上以問執政皆顧望未有對者張士遜進曰此獨不
肖子為之利用大臣宜不知狀太后大怒將并逐士遜
而王魯徐亦為利用解太后曰卿嘗言利用橫肆今何
解也曾曰利用恃恩素驕臣每以理折之今加以大惡
則非臣所知也太后意少釋丙辰貶利用為左千牛衛
上將軍知隨州仍令供奉官陳崇吉御史臺驅使官趙

崇諒乘驛伴送法寺議訥當斬王旻等亦抵死訥之母
妻皆緣坐徒三年詔杖殺訥妻論如法決其母杖十五
王旻杖脊配沙門島遇赦不還王元亨以喪明編管旁
州餘悉配廣南荆湖牢城知趙州及同判並謫監當本
路轉運使提點刑獄特釋之給趙德崇田五頃錢二百
千先是館閣校勘彭乘嘗與釣魚故事上未得魚侍臣
雖先得不敢舉竿及上得魚左右以紅絲網承之既而
乘同列亦得魚欲舉竿者左右止之曰侍中未得魚學

士竿未可舉也利用後得魚左右復以紅絲網承之利用弗禁乘出謂人曰曹公權位如此不以逼近自嫌而安于僭禮其能久乎無幾何利用敗利用常辟太常博士夏人司馬池為羣牧判官池辭不就朝廷固授之利用委池括大臣所負馬價池曰令之不行由上犯之公負尚多不先輸何以趣他人利用驚曰吏給我已輸矣亟命送官數日而諸負者皆入利用貶其黨畏罪從而毀短者甚衆池獨颺言稱利用之枉朝廷卒不問

王陶
談淵

載曹瑋任守信二事今附見當考曹利用晚節福過災
生剛愎驕傲人怨神怒天聖中姪閤門祇候洎為趙州
都監嬖一婢室家不和逐出為民妻民居在護戎公署
之北因壞垣不葺洎嘗出入其家尋舊好婢與其夫喧
爭洎衣淺色襖子入其家民亦被酒因有山呼之事既
奏至朝廷奏削匿于利用家數日因鎮定走馬任守信
入奏述其事方究尋其削翌日罷利用樞密使以節度
使司空侍中判鄧州未行物論甚喧洶洶數日間達于
天聽章獻后垂簾臨朝中書奏事訖留輔臣以詢其事
王沂公為昭文張鄧公集賢呂許公夏鄭公參預皆倉
皇無以對鄭公越次而奏云利用悖逆只乞問士遜十
年同在樞密以利用舉而大拜士遜無一言辯但兩泣
而已翌日再貶利用左監門衛將軍知隨州士遜罷相
守刑部尚書知江寧府內侍押班任守信為定州路鈐
轄一日習射于園中具左右惟見守信獨語云侍中何
故至此退立數步蹈于地從者翼歸正寢風涎大作已

不救矣先是守信天聖中為鎮定走馬承受時知定州曹瑋與大貂曹利用有隙會姪洸猖狂山呼于趙州奏入月餘未行瑋密諷守信以邊事入奏白于章獻劉后遂貶利用而非命死于道後守信赴官定州經由趙之高邑縣道旁一墳庄詢之誰氏曰故曹侍中墳守信自死覺神色慘沮至定不旬日而疾作具年瑋亦覺謝

戊午詔羣臣準詔舉官歲終不及其數者聽闕 詔罪人配隸他州而妻子不願從者聽之

二月庚申朔禮部侍郎參知政事魯宗道卒太后臨朝宗道屢有獻替太后問唐武后何如主對曰唐之罪人也幾危社稷后默然時有上言請立劉氏七廟者太后

以問輔臣衆不敢對宗道乃曰不可退謂同列曰若立
劉氏七廟如嗣君何帝與太后將同幸慈孝寺欲以大安
輦前帝行宗道曰婦人有三從在家從父嫁從夫夫歿
從子太后命輦後乘輿執政多任子于館閣讀書宗道
曰館閣育天下英才豈紈袴子弟得以恩澤處耶吾子
誠幼已任京官然終不使恩國恩曹利用恃權驕橫宗
道屢折之帝前自貴戚用事者莫不憚之時目為魚頭
參政因其姓且言骨鯁如魚頭也在政府七年務裁抑

僥倖不以名器私于人疾劇帝幸其第臨問賜白金三千兩既卒皇太后臨奠之贈兵部尚書初太常議謚曰剛簡復改為簡肅議者以為肅不若剛為得其實也王融作王曾言行錄及百一篇毀短宗道殊甚然他書莫不稱宗道剛簡可畏恐子融所云或出私意耳今不盡取

甲子同州觀察使知陳州李士衡為左龍武大將軍建州觀察使知衛州康繼英為右羽林大將軍並分司西京士衡曹利用妻父繼英亦利用姻家也 詔擇文臣

歷邊任而有材武及嘗為近臣舉充右職者并武臣之子孫在朝而有節義者與換官三路任使

乙丑詔諸路當職官吏或以職田俸粟及草濫估中官易致敗腐自今犯者以違制論所入並沒官募告者賞之

丙寅禮部尚書平章事張士遜為刑部尚書知江陵府士遜得宰相曹利用之力也利用長樞密憑寵自恣士遜居其間未嘗有是非之言時人目之為和鼓利用得

罪士遜又營救之利用既斥士遜隨亦罷上以士遜東
宮舊臣故加秩而遣之辭日又解通犀帶賜焉戶部

侍郎參知政事呂夷簡以本官平章事始王魯薦夷簡
可相久不用士遜將免魯因對言太后不相夷簡以臣
度聖意不欲其班樞密使張耆上爾耆一赤脚健兒豈
容妨賢至此太后曰吾無此意行用之矣于是卒相夷
簡以代士遜

此據魏泰雜記然泰所云請即宣召學士
草麻則恐不然蓋張知白死魯薦夷簡不

用而用士遜及士遜將罷魯復薦夷簡太后因用
之何必如是匆促且不類魯平日舉動故不取也

詔

羣牧制置使自今不得舉判官須朝廷差人

丁卯以樞密副使給事中夏竦為參知政事翰林學士
兼龍圖閣學士右諫議大夫權知開封府陳堯佐為樞
密副使龍圖閣學士右諫議大夫權三司使事薛奎為
參知政事奎入謝上諭奎曰先帝嘗以卿為可任今用
卿先帝意也御史中丞兼刑部侍郎晏殊為兵部侍
郎資政殿學士翰林侍讀學士兼祕書監故事當賜襲
衣金帶鞍勒馬上曰殊嘗輔政賜宜有異特以繡韉寵

之

戊辰翰林學士章得象權發遣開封府事時命龍圖閣待制王博文代陳堯佐而博文按真定獄猶未還也得象在開封府才二十七日性仁柔懼有冤濫命僧就第設七晝夜道場以禳之

初曹利用領景靈宮使令樞密主事蘇藏用令史趙兼素中書堂後官孟昱主宮中公使錢而利用嘗私貸錢未還法寺定利用為首當除名藏用等為從應徒二年

半詔藏用兼素昱並勒停利用同時坐數罪而貸官錢
法尤重癸酉再貶利用為崇信節度副使房州安置仍
命內侍楊懷敏護送之別選官知房州及監押巡檢利
用四子各奪兩官沒所賜第籍其家貲利用弟左侍禁
閤門祇候利涉前為趙州都監強市邸店役軍士治第
利涉時在京師亦詔劾于開封府法當奪三官勒停詔
特除名編管既而趙州又言利涉嘗盜官物遂決杖二
十利用舅太子中舍致仕韓君素居棣州頗恃勢放息

錢侵民又私醞酒具家特除名配沂州編管殿直田務
成為利用主家事嘗因事受賕崇儀副使田承說又以
書抵務成妄言錢惟演有章營解利用務成坐贓追兩
官勒停仍編管承說亦贖銅七斤有司籍利用家貲得
水晶盃盤十副賈人不能言其直曰此非人間所常有
也有老估人識之曰噫此物官有舊價矣又何估焉吏
詰之曰此丁侍中故物也侍中敗官籍其家貲吾蓋嘗
估之吏閱視舊牘果如所言甲戌以戶部副使度支負

外郎王駿為司封員外郎知潮州羣牧判官太常丞韓
琚同判濠州太子中允集賢校理李丕諒落職同判和
州駿利用同里人相厚善琚利用所薦丕諒士衡子即
其妻兄故皆絀之通判許州陽翟祕書丞程勣利用女
壻也亦坐降通判蘄州

程勣事據本傳
實錄不書也

又以西上閣

門使曹琮為河陽都監淮南江浙荆湖制置發運使六
宅使康州刺史劉承顏知處州知瀛州禮賓使魏正為
杭州都監皆利用所親厚者琮瑋之弟也時朝廷以利

用嘗所薦擢者多領兵守邊欲悉罷去之殿中侍御史

鞠詠請一切毋治以安反側詔從詠言

曹侍中利用因姪汭聚無賴不

軌獄既具有司欲盡劾交結利用者時憚人幸其便陰以文武四十餘人諷之俾深治仁宗察之急出手詔其文武臣僚內有先曾與曹利用交涉往還曾被薦舉嘗親暱之人並不得節外根問其中雖有涉汭之事者恐或註誤亦不得深行鍛鍊其仁卹至此是年聖算方二十此僧文瑩所錄也其事不見于實錄正史然鞠詠請勿治利用所薦擢領兵者不知其從違按此則詠言必從矣今但借此用記詠言仍削而不著

乙亥召工部侍郎知永興軍王曙為御史中丞詔以

朝廷事簡中書樞密院聽午後五刻出

甲申捧日天武四廂都指揮使鄭守忠等請如殿前都指揮使例從皇太后駕出從之守忠陳留人也

此段當考不然

削去

乙酉賑河北沿邊水災饑民州縣有不任職者轉運使亟選所部官代之河北轉運使言自河平以來澶州諸埽未嘗完築恐盛夏益復漲溢請募民入中芻糧以備緩急詔可

閏二月辛卯詔近臣除居第外毋得於京師廣置物業

宦者多惡曹利用必欲置之死楊懷敏護送利用行至襄陽驛懷敏不肯前且以語逼之利用素剛遂自經死懷敏乃奏利用暴卒始契丹深入寇朝廷方厭兵第憂盟不就顧於聘賂無所愛而利用以小官奉使敢任大事力勒其數於國有勞既富貴負恃以為已功性又悍梗少通力裁僥倖而其親舊亦有因緣以進者故及於禍然其在朝廷忠蓋有守始終不為屈柔死非其罪天下寃之後其家請居鄧州上惻然從之且命利用子

內殿崇班淵監本州稅

曹淵監鄧州稅恐自有時當考景祐二年四月始聽利用諸子

還京師十月以舊第四之一還利用子孫

癸巳詔河北經水州軍募人入粟以濟貧民

乙未詔河北河東沿邊及廣南東西路自今募職州縣

官初改京朝官者並以為福建路知縣

當考

丙申以左藏庫使滄州鈐轄閻文應兼雄霸沿界河同

巡檢河北屯田司事仍許每歲以秋冬入奏

丁酉詔曹利涉田產非強市者悉還之

甲辰詔文臣換右職者聽任子弟為文資 揚州召伯
閘成賜發運使鍾離瑾敕書獎諭初監楚州稅王乙請
自召伯埭東至瓜步濬河一百二十里以廢二堰下發
運使規度而瑾言功大不可就止置閘召伯埭旁既成
公私利之

乙巳供奉官王仁旭為閤門祇候仁旭馬軍都指揮使
夏守贊女壻守贊以乾元節任子恩授之仍詔毋得援
例

戊申上謂輔臣曰比建慈孝寺蓋以薦福先帝及太一宮為民祈禳幸已畢功自今京城惟倉庫營房官舍敝壞者修完之餘無得擅興力役因下詔諭中外時都人厭土木之勞及詔下咸喜

壬子詔曰朕開數路以詳延天下之士而制舉獨久置不設意吾豪傑或以故見遺也其復置此科于是稍增損舊名曰賢良方正能直言極諫科博通墳典明于教化科才識兼茂明於體用科詳明吏理可使從政科識

洞韜略運籌決勝科軍謀宏遠材任邊寄科凡六以待
京朝官之被舉及應選者又置書判拔萃科以待選人
之應書者又置高蹈丘園科沉淪草澤科茂材異等科
以待布衣之被舉及應書者又置武舉以待方略智勇
之士其法皆先上藝業於有司有司較之然後試秘閣
中格然後天子親策之若武舉則仍閱其騎射焉初盛
度建言於真宗請設四科以取士曰經術之士若典刑
備舉則政教流行請設博通墳典達於教化科堯試臣

以事不直以言語筆札求人審官期於適用請設才識
兼茂明于體用科今戎警未除調邊勞戍必資良帥以
集事功請設軍謀宏遠堪任將帥科獄事之繁民命所
繫若推按失實則枉情傷生請設明曉法律能按章覆
問科景德二年遂置六科蓋緣度之議也時度方責洪
州密詔度撰策自馳驛以進及議封禪吏部科目皆廢
夏竦既執政建請復制舉廣置科目以收遺才上從之

更采度前議而降是詔

度本傳云初度謫洪州建議賢良方正科密詔度撰策目以進

度又請建六科既而用夏竦議置六科其議亦是度始按賢良方正科自乾德二年始復置是年額贊應詔四年姜涉應詔咸平四年又置是年查道王曉陳茂等應詔真宗親策何亮孫暨孫僅丁遜等而度謫洪州乃景德元年閏九月然則傳所稱度請復賢良方正科誤矣蓋賢良方正科其復已久度更欲廣其科目而景德二年所置六科實用度議故度雖在謫所真宗猶令度撰策目以進也及仁宗用夏竦議更置六科其科目尚多取度所言者故傳云其議亦自度始今稍刪潤使不相抵牾

癸丑置理檢使以御史中丞為之其登聞檢院匭函改為檢匣如指陳軍國大事時政得失並投檢匣令畫時進入常事五日一進其稱冤濫枉屈而檢院鼓院不為

進者並許指理檢使審問以聞時上封者言自至道三年廢理檢院而朝廷得失天下冤枉浸不能自達會上讀唐史見匭函故事與近臣言之夏竦因請復置使領

上從其議乙卯始命御史中丞王曙兼理檢使

淳化三年五月

置理檢院至道三年十一月乙酉廢

大理寺言比部員外郎夏侯彧等

一十一人並嘗保薦曹利涉而利涉所入差遣每緣利用陳乞難坐薦者之罪上曰所薦如此其人亦可知矣當薄懲之乃詔各罰銅三十斤詔中書門下凡左右

近臣有子弟族姻仕於諸道州府者令轉運使副及長吏等謹察其臧否無得曲庇之

會要閏二月
詔實錄無之

三月庚申朔詔龍圖閣待制以上自今非任要劇毋得奏異姓親

辛酉以右班殿直何九齡為貝州兵馬監押管勾河北東西路屯田隄道九齡父承矩實興屯田為扞邊之利特命領之

癸亥詔如聞京城諸倉所納軍糧多聚量過數以故綱

吏積欠或破產不能償官綱吏亦有與諸倉為弊槩量不足乃減刻軍食以補之其令提點倉場官與點檢斗面使臣躬親閱視自今界中有羨數監官更不理為勞績先是諸倉所支多從減刻計所收羨數以圖恩賞故條約之又諸倉納糧綱槩量不實操舟者坐亡失所載或杖脊徙重役殿中侍御史陳琰始奏選官監視謂之定斗面至今行之

定斗面據陳琰新傳附見至今行之蓋指元豐間也

三司使

寇瑊繩下急漕數不足綱吏卒率論以自盜勾當東排

岸司符惟忠爭曰在法欠不滿四百石者不坐若以自盜論則計直八百即當坐徒矣瑛怒曰敢抗三司使耶惟忠曰職有當辯非抗也瑛益怒惟忠爭愈力如所議

乃已惟忠彥卿曾孫也

此事附見

乙丑詔吏受賕自今毋用蔭時三司吏毋士安坐受賕法應徒而用祖縣令蔭以贖論特決杖勒停而降是詔丙寅詔諸州公用供帳之物毋得假借於民其故弊者聽以不係官頭子錢更製從御史中丞王曙之請也

癸酉范雍丁母憂起復

甲戌詔廣南福建幕職州縣官赴所任如川峽例給以館券屯田郎中李璣言渝州當二江之險綱船至者比為風濤所溺其失官物三二分者法當備償全綱失者反不坐以故舟人不敢救而船歲溺者不可勝數請自今若失全綱舟人皆杖一百主吏遞降一等其官物判為三分須償一分如救及分而無侵欺者釋其罪從之

戊寅上謂輔臣曰王欽若久在政府察其所為真奸邪也王魯曰欽若與丁謂林特陳彭年劉承珪時號為五鬼其奸邪險詖之迹誠如聖諭 賜畿內治溝洫役卒緡錢 祠部員外郎祕閣校理陳詒知祥符縣治嚴急吏欲動朝廷使罪詒乃空一縣逃去太后果怒而詒妻宰相呂夷簡妹也執政以嫌不敢辨事下樞密院副使陳堯佐獨曰罪詒則奸吏得計後誰敢復繩吏者詒由是獲免徙知開封縣詒辭乃命權判吏部南曹

庚辰詔自今召試人令學士舍人院試詩賦如舊制以
近歲所試論策其文汗漫難考也

天禧元年九月可考

命西染

院使盧鑑往陝西緣邊計置糧草河北轉運使言契

丹歲大饑民流過界河上謂輔臣曰雖境外皆吾赤子

也可不賑救之乃詔轉運司分送唐鄧襄汝州處以閑

田所過州縣給食人二升審官院請京官到院各具

所欲入路分狀一本願入遠及折資者聽凡經再問闕

不就即依名次硬差丁憂服闋及自不般家處代還許

至三問從之

壬午上謂監修國史王魯曰先朝美政甚多可諭史官
詳載之因言兩漢書文辭溫雅唐書殆不能及也王魯
退相謂曰上日省四方封奏間閱經史見前代述作之
體且善評之自昔好文之主亦未嘗留意及此

癸未詔百官轉對極言時政闕失如舊儀在外者實封

以聞既而謂輔臣曰所下詔宜增朋黨之戒

景德三年四月詔羣

臣轉對不知何時罷今又復之王偁東都事略詔曰國
家設制策之科將博詢於鯁議有能規朕躬之過失陳

宰相之闕遺糾中外之姦回斥左右之朋比述未明之機事貢無隱之密謀以至臺省之官阿私而罔上郡國之吏專恣以濫刑或通受貨財潛行請託或恃憑權勢敢事貪殘並許極言朕當親覽其令百官遇起居日轉對在外臣僚亦許具實封以聞

羣牧判官龐籍因轉對言舊制不以國馬假臣下重武備也樞密院以帶甲馬二借內侍楊懷敏羣牧覆奏乃賜一馬三日而復借之數日而復罷樞密掌機命反覆如此平時百官奏事上前不自批章止得送中書樞密院蓋防偏請以啓倖門近歲傳宣內降寢多於舊臣恐法度自是隳也往者王世融以公主

子毆府吏法當贖金特停任近作坊料物庫主吏宮掖之親盜三物輒自逃三司捕未獲遽罷追究今日聖斷乃異於昔臣竊惑焉又祥符令檢吏稍嚴胥吏相率空縣而去令坐罷免若是姑息者獲安而清强者沮矣籍武城人也如羣牧判官闕以內降求之者凡十數人執政患之相與謀曰得孤寒中有聲望才節可服人者與之則中旨可塞矣乃以籍姓名進詔遂用籍羣牧判官司馬池因轉對言唐制門下省詔書出有不便者得

以封還今門下雖有封駁之名而詔書一切自中書下
非所以防過舉也內侍皇甫繼明等三人給事太后閣
兼領估馬自言估馬有羨利乞遷官事下羣牧司閱實
無羨利繼明方用事自制置使以下皆欲附會為奏池
獨不可吏拜曰三中貴人不可忤也池不聽繼明等怒
甚會除開封推官敕至閣門為繼明黨所沮罷乃以屯
田員外郎出知耀州

池轉對附此出知
耀州當考其時

甲申上封者言天下茶鹽課虧請更議其法帝以問三

司使寇瑛瑛曰議者未知其要爾河北入中兵食皆仰給於商旅若官盡其利則商旅不行而邊民困於餽運矣法豈可數更帝然之因謂輔臣曰茶鹽民所食而強設法以禁之致犯法者衆但緣費甚廣未能施之又安可數更其法也 泰州鹽課虧緡錢數十萬事連十一州詔殿中丞張奎往按之還奏三司發鈔稽緩非諸州罪因言鹽法所以足軍費非仁政所宜行若不得已令商人轉貿流通獨關市收其征則上下皆利孰與設重

禁壅閼之為民病有詔悉除所負奎臨濮人全義七世

孫也

奎事不得其時附
茶鹽課虧復當考

增置潭州同判一員從太常

少卿李若谷請也

詔廣西轉運司選曾親民政諳練

邊事強幹使臣知融州

丙戌遣官祈晴上謂輔臣曰昨令視四郊而麥已損腐

民何望焉此必政事未當天心也古者大辟外州三覆

奏京師五覆奏蓋重人命如此其戒有司審獄議罪毋

或枉濫又曰赦不欲數然捨是無以召和氣

夏四月庚寅赦天下免河北被水民賦租京師自三月朔雨不止前赦一夕而霽

辛卯遣官謝晴殿中侍御史張逸言庚寅赦書十惡與四殺連文並為已殺人者不赦然則十惡非殺人者亦得赦矣恐非詔意請明示有司遂詔十惡罪無輕重皆不赦

壬辰置石州定胡縣兵馬監押一員 三司發運使言黃河挽舟卒不習湍險多溺死詔中書召三司使議之

乃於河陰募置水軍二千人

乙未置萊州萊陽縣采金場

己亥契丹遣興國節度使耶律褒大理少卿張震來賀
乾元節

庚子詔天下稅務毋得瀆壞商人物帛初內出蜀羅一
匹為印朱瀆壞者數重故條約之

己酉貝州言民之析居者例皆加稅謂之罰稅惟其家
長得免清河清陽歷亭三縣戶罰絲五分鹽五升錢五

十武城縣復增錢五十漳南縣又增蜀黍八升而他州悉無此例請除之詔可

李公蘊之子德政自稱權知安南靜海軍留後事遣使來告哀辛亥贈公蘊侍中南越王命廣南西路轉運使王惟正為祭奠使又為賜官告使除德政檢校太尉靜海軍節度使南安都護交趾郡王

乙卯開封府推官屯田員外郎李昭述知常州昭述宗諤子也嘗為曹利用所薦故出之

丙辰詔鄧州賜契丹歸明人李美田十頃美自言舊籍
邢州之內邱祖紹溫陷契丹距今八十年比歲因饑挈
族來歸祖莊尚在且有祖永安侍中告身四通嘗訴於
縣而村保房從莫肯認者乃詔賜田於鄧州仍令長吏
善撫之 詔進奏院自今諸道州府更有附遞到三班
使臣幕職州縣官等實封奏章並令收接進納

欽定四庫全書

續資治通鑑長編卷一百八

宋 李燾 撰

仁宗

天聖七年五月己未朔詔禮部貢舉庚申詔曰朕試天下之士以言觀其趨向而比來流風之敝至於菁萃小說磔裂前言競為浮誇靡蔓之文無益治道非所以望於諸生也禮部其申飭學者務明先聖之道以稱朕意

焉

甲子上謂輔臣曰比聞川廣幕職州縣官有過期未代者此豈人情之所樂耶其令吏部流內銓亟選代又曰羣臣請對者多求進少求退何也王魯曰苟抑奔競崇靜退則庶幾有難進之風矣上然之

己巳詔以新令及附令頒天下始命官修定成三十卷有司又取咸平儀制令及制度約束之在敕其罪名輕者五百餘條悉附令後號曰附令敕詔廣南民自今

祖父母父母在而別籍者論如律已分居者勿論先是同判桂州王告言劉氏時應祖父母父母在孫子既娶即令析產其後富者數致千金而貧者或不能自給及朝廷平嶺南乃知法不得以異居爭訟至今不息請條約之故降是詔

庚午詔國朝曾任兩府及宣徽使四經郊祀未錄用子孫者官其親屬一人三經郊祀而見無食祿者即與推恩刺史少卿監以上六經郊祀未錄用子孫及見無食

祿亦官其親屬一人郎中及帶職員外郎升朝官為西川廣南知州軍監物故者歷任非犯贓本家見無人食祿並聽以遺表聞上封者言近邊內地州郡多是儒臣知州邊事武略安肯留意欲望自今選有武勇謀略內殿崇班已上三二十人於河北河東陝西及西川廣南不以遠近但路居衝要處知州得替日具本處民間利害或邊事十件聞奏或朝廷要人驅使詢之於朝則曰某人曾在某處知某處事宜則是先試之以近邊之

事後委之以臨邊之任或為州郡之防或為偏裨之將
不乏人矣樞密院請令武臣閣門祇候以上知州軍代
還日知州言事五件內三件民間利害二件邊事或兵
馬利便其知軍言事三件內二件民間利害一件邊事
或兵馬利便從之

先是侍御史高弁內侍楊懷敏往澶州視決河議築大
韓埽又遣內侍綦仲宣覆按之仲宣言大河已安流諸
埽亦足恃帝亦重興役壬申以諸埽圖示輔臣罷大韓

不復築弁又請弛隄防縱水所之可省民力且以扼敵

人不報

此據高弁傳十二月辛亥實錄載弁議更考之

詔臣僚奏事無得請

批依奏送中書時刑部上殿批依奏而中書以大中祥

符七年詔書申明之

祥符七年詔書在三月七日戊寅

癸酉御崇政殿錄繫囚

甲戌太常博士范諷為右司諫先是諷知廣德軍尋以疾監舒州靈仙觀上御藥張懷德至觀齋祠諷頗要結之懷德薦於太后遂召還問所欲言對曰今權臣驕悍

將不可制蓋指曹利用也利用貶久之乃授諷諫官

乙亥知制誥李仲容石中立並坐失保任落史館修撰
罰銅十斤

庚辰上與太后御承明殿羣臣請對者凡十九班至第
九班賜輔臣食於崇政殿門有頃再坐日昃乃罷

辛巳詔諸知州軍同判部署鈐轄都監監押巡檢寨主
不俟詔而輒去官者從監臨擅離場務敕加二等計日
重者從在官無故亡律餘官減敕條二等即有規避及

致廢事加一等輒受牌印者減罪人一等

六月辛卯命資政殿學士兼翰林侍讀學士晏殊龍圖閣待制孔道輔馬季良看詳轉對章疏及登聞檢院所上封事類次其可行者以聞右司諫范諷曰非上親覽決可否則誰肯為陛下極言者不踰月詔罷看詳

壬辰置益梓廣南路轉運判官與轉運使分部按巡位諸州同判上別給印分巡即用之仍詔磨勘及三年者遷一官議者以為自罷諸路提點刑獄而益梓廣南止

一轉運使不能周知民事故也

癸卯增川陝四路進士解額益州四人梓州二人餘州

軍下及三人者聽解三人

元額若干當考

甲辰詔鎖廳應舉人自今在京有職事無職事已罷未赴並聽于國子監開封府取解外任者聽于別州仍先取旨文臣許兩應武臣止一

丁未大雷雨玉清昭應宮災宮凡三千六百一十楹獨長生崇壽殿存焉翌日太后對輔臣泣曰先帝力成此

宮一夕延燔殆盡猶幸一二小殿存爾樞密副使范雍度太后有再興葺意乃抗言曰不若燔之盡也太后詰其故雍曰先朝以此竭天下之力遽為灰燼非出人意如因其所存又將葺之則民不堪命非所以祇天戒也宰相王魯呂夷簡亦助雍言夷簡又推洪範災異以諫太后默然太廟齋郎蘇舜欽詣登聞鼓院上疏曰烈士不避鈇鉞而進諫明君不諱過失而納忠是以懷策者必吐上前蓄冤者無至腹誅然言之難不如容之難

容之難不如行之難有言之必容之行之則三代之主也幸陛下留聽焉臣觀今歲自春徂夏霖雨陰晦未嘗少止農田被菑者幾於十九臣以為任用失人政令多乖賞罰失中之召也天之降災欲悟陛下而大臣歸咎于刑獄之濫陛下聽之故肆赦天下以為禳救如此則是殺人者不死傷人者不抵罪而欲以合天意也古者斷決滯訟以平水旱不聞用赦故赦下之後陰霾及今前志曰積陰生陽陽生則災見焉乘夏之氣發洩于玉

清宮震雨雜下烈焰四起樓觀萬疊數刻而盡非慢於
火備乃天之垂戒也陛下當降服減膳避正寢責躬罪
已下哀痛之詔罷非業之作拯失職之民察輔弼及左
右無裨國體者罷之竊弄威權者去之念政刑之失收
芻蕘之論庶幾可以變災為祐浹日之間未聞為此而
將計工役以圖修復都下之人聞者駭惑聚首橫議咸
謂非宜皆曰章聖皇帝勤儉十餘年天下富庶帑府流
衍乃作斯宮及其畢功海內虛竭陛下即位未及十年

數遭水旱雖征賦咸入而百姓困乏若大興土木則費用不知紀極財力耗于內百姓勞于下內耗下勞何以為國況天災之已違之是欲競天無省已之意逆天不祥安已難任欲祈厚貺其可得乎今為陛下計莫若來吉士去佞人修德以勤至治使百姓足給而征稅寬減則可以謝天意而安民情矣夫賢君見變修道除凶亂世無象天不譴告今幸天見之變是陛下修已之日豈可忽哉昔漢宣帝三年茂陵白鶴館災詔曰廼者火災

降于孝武園館朕戰栗恐懼不燭變異罪在朕躬羣有司又不肯極言朕過以至于斯將何寤焉夫茂陵不上都白鶴館大不及此宮彼尚降詔四方以求已過是知古之帝王憂危念治汲汲如此臣又按五行志賢佞分別官人有序率由舊章禮重功勲則火得其性若信道不篤或耀虛偽讒夫昌邪勝正則火失其性自上而降及濫災妄起燔宗廟燒宮室雖興師徒而不能救故魯成公三年新宮災劉向謂成公信三桓子孫之讒逐

父臣之應襄公九年春宋災劉向謂宋公聽讒逐其大夫華弱奔魯之應也今宮災豈亦有是乎願陛下恭默內省而追草之罷再造之勞述前世之法天下幸甚舜欽時年二十一易簡之孫耆之子也

舜欽上疏正史不載其月集亦無月

今附見

戊申龜茲國遣使來貢方物

己酉詔三司使副子弟毋得任在京錢穀場務

甲寅門下侍郎兼吏部尚書平章事王曾罷為吏部尚

書知兗州始太后受尊號冊將御天安殿魯執不可及
長寧節上壽魯執不可如前皆供張別殿太后左右姻
家稍通請謁魯多所裁正太后滋不悅會玉清昭應宮
災魯以使領不嚴累表待罪乃罷出守尋改青州 詔
入內侍省自今抽差親從親事官須憑皇城司文字
抽差不得令使臣直行勾取先是有內侍鄧德用傳宣
親從第一指揮勾抽副校黃遂以下二百六十人赴昭
應宮救火無文字闕本司上以為非便故有是詔

是月河北大水壞澶州浮橋

秋七月戊午朔命戶部副使刑部郎中鍾離瑾為河北安撫使作坊使范宗古副之仍詔瑾等所至發官廩以賑貧乏其被溺之家存三口者給錢二千不及者一千溺死而不能收殮者官為瘞埋已檢放稅外聽就近輸官權停州縣配率其經水倉庫營壁亟修完之庫下者徙高阜處水壞官物先為給遣坊監亡失官馬者不加罪第根究送所部官吏貪暴者奏劾之囚繫獄者委長

吏從輕決遣其邊防事機民間疾苦悉具經畫以聞

辛酉知光州左領軍衛大將軍石普責授左監門衛率
滁州安置同判祕書丞王植郴州長史初植訟普受所
部贓私用修孔子廟錢及遣官即訊而并得植贓狀故
皆坐之普尋徙潁州

壬戌禁士庶僧道以朱漆床榻

癸亥以玉清昭應宮災遣使奏告諸陵

甲子刑部郎中狄棐為契丹后生辰使作坊使陳宗憲

副之

陳宗憲
未見

乙丑翰林學士兼侍讀學士中書舍人同修國史宋綬
落學士綬領玉清昭應宮判官而宮災故責之內侍為
都監承受者停降贖銅有差道士杖脊者四人決杖者
五人知宮李知損乃編管陳州御史臺鞠火起得知損
嘗與其徒茹葷聚飲宮中故也初太后怒守衛者不謹
悉下御史獄欲誅之中丞王曙上言昔魯桓僖宮災孔
子以為桓僖親盡當毀者也遼東高廟及高園便殿災

董仲舒以高廟不當居遼東殿不當居陵旁故災魏崇
華殿災高堂隆以臺榭宮室為戒宜罷之勿治文帝不
聽明年復災今所建宮非應經義災變之來若有警者
願除其地罷諸禱祠以應天變而左司諫范諷亦言此
實天災不當置獄窮治監察御史張錫言若反以罪人
恐重貽天怒言者既衆上及太后皆感悟遂薄守衛者
罪議者尚疑將復修宮諷又言山木已盡人力已竭雖
復修必不成臣知朝廷亦不為此其如疑天下何願明

告四方使戶知之已已下詔以不復修宮之意諭天下
改長生崇壽殿為萬壽觀 禁淮南兩浙荆湖諸縣鎮
買撲酒戶因民有吉凶事輒出引目抑配沽酒違者聽
民告募人代之

癸酉出內藏庫權貨務緡錢各十萬下陝西河北助糴
軍儲

乙亥詔殿直以上自今不得換文資又詔文武官奏薦
別房子弟及異姓親年幼未得俸而本房無人食祿者

具以名聞

乙酉罷輔臣所領諸宮觀使名從呂夷簡張昞夏竦之請也 詔每年賜諸道州府軍監衣襖自今並就逐處依所降樣製造但遣使臣齎詔敕取賜免自京般送之勞從三司奏請也

八月丁亥朔日有食之 詔曰先帝患吏廩不給而廉潔者亡以勸故並錫之公田歲月浸深侵牟滋長獄訟數起反以害人重失先帝之意其罷天下職田官收其

入以所直均給之仍委三司別為條約先是上封者言
職田有無不均吏或不良徃徃多取以殘細民請罷之
詔資政殿學士晏殊與三司審官三班院吏部流內銓
參議皆以為然乃降是詔

己丑宰臣呂夷簡加吏部侍郎昭文館大學士

辛卯樞密使張旻改山南東道節度使參知政事夏竦
加刑部侍郎復為樞密副使樞密副使范雍姜遵陳堯
佐並加給事中堯佐改參知政事竦與夷簡不相悅故

以堯佐易之 御史中丞王曙為工部侍郎參知政事

江南東路轉運使王碩兩浙轉運使司封員外郎劉

楚並追官勒停坐失保任也

保任何人當考

甲午詔國子監進士自今以五十人為解額

戊戌上封者言三院御史故事多出知州比來王汾李

絃朱諫並自知縣除省府推官遂為轉運使副擢任太

速請自今御史並舉歷知州同判人具見在臺資淺者

且令出知州從之

此事當考并九月己未日所書

自定折杖之制長

短廣狹皆有尺度而輕重無準官吏或得任情至是有
司以為請乃詔凡所用杖重無過十五兩施印其上責
所部常驗視之

已亥詔命官犯正入已贓者自今毋使親民

癸卯禮部員外郎兼侍御史知雜事鞠詠為契丹主生
辰使供奉官閤門祇候王永錫副之職方員外郎判三
司理欠司張羣為正旦使如京副使石元孫副之戶部
判官度支員外郎蘇耆為契丹后正旦使內殿承制閤

門祇候王德明副之

乙巳詔邊郡差官便糴軍儲而穀多粃惡濕腐不可食
自今雖去官無得免其罪

己酉置江寧府沿江巡檢二員 三司言舊制臣僚限
田三十頃而止于一州之內卜葬者或拘以陰陽之說
則舉事為難請聽于他州別置墓田毋得過五頃從之
壬子詔戎州夷人犯罪委知州和斷之若漢人即正其
法及三年不生事者特遷一資

九月戊午定王元儼改封鎮王

已未詔御史臺自今三院御史非朝參無得私出

此事與前

月戊戌所書皆當考或必有故也會要云寶元二年四月以御史王素言又申明降詔

丙寅詔閤門自今入內都知押班如昭宣使以上即與客省使等為一班皇城使副以下並在皇城使之前別在一行太祖朝都知押班率供奉官為之內中祇應裹頭巾衣褐衫而已宰相呂夷簡不考故事輒升其班次

議者非之

都知押班裹頭巾衣褐衫此據江休復雜志又云許公升都知押班班次不報御史臺至

今每遷官必奏免
正衙此事當考

戊辰澶州官吏並坐王楚埽決貶官一等

庚午詔審官院大理寺詳議詳斷法直官自今非本司
主判官同罪舉者無得除

辛未改永定軍為永寧軍避真宗陵名也縣驛有同名
者皆改之

甲戌司封員外郎趙廓言前判大理寺每集定急案唯
本案官繫書而他法官不與恐不能盡心請自今悉令

簽書若議刑有失則并坐之從之

丁丑詔押賜諸路衣襖每歲遣技術官自今以閤門久
宣贊及勲舊子弟之貧者參用之 編敕既成合農田

敕為一書視祥符敕損百有餘條其麗于法者大辟之
屬十有七流之屬三十有四徒之屬百有六杖之屬二
百五十有八笞之屬七十有六又配隸之屬六十有三
大辟而下奏聽旨七十有一凡此皆在律令外者也於
是詔下諸路閱視聽言其未便者尋又詔書一年無改

易然後鏤版頒行

辛巳詔翰林學士知雜御史而上舉常參官歷同判一任無贓濫而才任繁劇者各一人已之所親及執政近屬毋得舉 又詔審官院自今定差知州軍令中書審視若懦庸老疾不任事者罷之

壬午徙知青州李迪知河南府迪朝京師太后語迪曰卿昔者不欲吾預國事殆過矣今日吾保養天子至此卿以為何如迪對曰臣受先帝厚恩今日見天子聖明

誠不知太后聖德乃至此太后亦喜

癸未詔三司令商人在京師入中馬草一千萬束

冬十月丁亥故太子左諭德崔遵度妻舒城縣君何氏
特封樂安郡君遵度嘗事上東宮其子左班殿直仲思
願以所遷官回授母一郡封上既許之仍詔遷仲思官
辛卯詔京東河北水災州軍已減秋稅聽即本處輸見
錢仍停科率一年訴不及限者亦體量減放

甲午詔在京諸軍班諸所支月糧令提點倉場官三糧

料院依排定諸倉年月界分以軍資高下給之違者許人告公人遷一資百姓給賞錢三十千先是上封者言諸糧料院所勘旁多遠近不均有軍營在西而給東倉或在東而給西倉固欲以邀求軍人事下三司三司言凡支軍糧皆自糧料院先進樣然後三司定倉廩界分而以年月次之今城東十二倉貯江淮所漕米最多城南惟有米一倉城西三倉兼貯茶城北四倉貯畿內賦稅及馬料所貯既不同難據軍營遠近就支自今諸糧

料院如敢用此有所邀求請重致于法故降是詔

按沈括筆

談云太祖朝常戒禁兵衣之長不得過膝買魚肉及酒入營門者皆有罪又置更戍之法欲其習山川勞苦遠妻孥懷土之戀兼外戍之日多人人少子而衣食易足又京師衛兵請糧者營在城東者即令赴西倉在城西者即令赴東倉仍不許僦車脚皆須自負嘗親登右掖門觀之蓋使之習力制其驕惰故士卒衣食無外慕安辛苦而易使今上封事者指陳糧料院勘旁之弊不知乃太祖法也更當詳考表而出之

壬寅御崇政殿閱虎翼武騎卒習戰遷補有差

丙午京師地震詔知州軍文武陞朝官歲舉見任判

官主簿尉有罪非賊私有出身三考無出身四考堪縣

令者各一人轉運使副不限以數舉者及二人移注近縣令任滿無贓罪公私罪情輕用刑無枉濫促賦無追擾本部上治狀陞幕職再知縣又無過譴或有罪而公私情輕職業愈修者替還引對特遷京官仍逐任與免選納粟及流外入令皆增考舉數先是流內銓引選人朝辭有老耄者授縣令上謂宰臣曰縣令之職有民有社一邑刑政重輕皆得自專若非其人為害不細雖遠方僻郡尤當擇人宣朝廷德意此輩皆昏耄使之臨民

必有貪墨疲懦之弊會有上言乞奏舉以充縣令乃降

是詔

上云云據張唐
英政要當考

丁未詔淮南江浙荆湖制置發運使奏計京師毋以土
物饋要近官先是鍾離瑾因奏計多載奇花怪石納禁
中且賂權貴殿中侍御史鞠詠右司諫劉隨皆劾瑾詠
請付御史臺治帝面諭瑾亟還所部于是又條約之

樞密院言御馬直于榮鬻自制紫衫而開封府以軍號
法物定罪請下法官議而審刑院言紫衫榮所自制非

官給難以從軍號法物定罪乃詔自今諸軍班典買官
所給軍號法物者以違制論自餘以不應為從重科之
壬子復給事中知永興軍李諤為樞密直學士永興衣
冠子弟多恃蔭無賴者諤悉杖之境内肅然 內殿崇
班帶御器械夏元正為閤門宣事舍人元正初以武技
自陳召見詔騎射擢為帶御器械既而以其父守贇方
典禁兵故改命之 下溪州蠻彭仕端仕義等來貢方
物

癸丑河北知州軍多武臣其幕職官又或經學出身而書斷案牘頗不通自今令吏部流內銓選嘗為人薦舉者注擬之流內銓言應初任官未得求試書判拔萃須歷四考以上方得投狀其見任沿邊川廣福建及見係銓司起請移官人並須回日投狀仍先以所納到判詞編排作三等具奏乞下兩制別差官考定詔歷官三考以上乃聽投狀看詳判詞分三等只委判銓官餘從之

十一月乙卯朔黔州蠻舒延蠻來貢方物

庚申詔京朝官自今依景德四年七月敕到闕以前轉官及三年者聽磨勘未及者須四年其任廣南西川及三年許上課于審官院

癸亥冬至上率百官上皇太后壽于會慶殿乃御天安殿受朝祕閣校理范仲淹奏疏言天子有事親之道無為臣之禮有南面之位無北面之儀若奉親于內行家禮可也今顧與百官同列虧君體損主威不可為後

世法疏入不報晏殊初薦仲淹為館職聞之大懼召仲淹詰以狂率邀名且將累薦者仲淹正色抗言曰仲淹繆辱公舉每懼不稱為知己羞不意今日反以忠直獲罪門下殊不能答仲淹退又作書遺殊申理前奏不少屈殊卒媿謝焉又奏疏請皇太后還政亦不報遂乞補外尋出為河中府通判

歐陽修作仲淹神道碑云太后將以至日大會前殿上率百官

為壽仲淹言之其事遂已按仲淹疏入不報上壽會慶殿未嘗已也豈修謂止在便殿不在前殿為聽仲淹之言乎然供帳便殿實自王魯執奏非由仲淹矣修蓋誤今不取富弼作仲淹墓碑亦云疏奏遂罷上壽儀然後

頗不憚尋出為河中府通判弼亦誤今但取其出倅河中附見于此僧文瑩以為仲淹時任右司諫太后先遣中使諭令勿言此妄也今不取

庚午詔天下孤獨疾病之民所在為致醫藥存視之

詔逃田十年見荒閑者聽百日復業與免賦役後五年與減舊稅十之八限滿不至他人請佃者亦如之

上封者言今歲開封府舉進士者至千九百餘人多妄冒戶籍請條約之癸酉詔舉人有開封府戶籍七年以上不居他處者聽取解雖無戶籍亦不曾占名他州者

先經所屬投牒察訪行實召京朝官二人保之違犯則保官以違制論其外州寄應者悉令還本貫與理舊舉場第若行賂而妄冒鄉貫三代者以違制失論不以蔭贖

丙子詔廣南福建官丁憂未有替人而見任事者續其俸
繡州蠻向光緒遣使來貢方物

庚辰賜莫州順安軍修城卒緡錢

癸未詔陝西弓箭手已刺而逃者聽本家權以少壯子

弟代役滿三月不首即使其子弟為之

是月詔自今每遇南郊大禮錄周世宗從孫一人班行

此據本
志當考

十二月丁亥賜永靜軍修城卒緡錢

庚寅以知制誥李仲容判禮部故事茂才異等高蹈邱
園沈淪草澤三科所上策論先委吏部考覈以聞乃得
召試時直史館康孝基判禮部定富弼等十人詞理皆
優上意其品藻未精故改命仲容而以孝基為同判仍

取弼等策論覆校之弼河南人也

丁酉詔河北盜決屯田堰岸者從盜決隄防律再犯者
送河南州軍編管

庚子詔中書自今朝官以上告詞別錄本上禁中

乙巳賜深州邢州修城卒緡錢

己酉契丹遣奉國軍節度使耶律曷崇祿少卿韓知白
來賀皇太后正旦

庚戌遣中興軍節度使耶律倚賓州防禦使韓昭一來

賀正旦

辛亥以左司諫龍圖閣待制孔道輔知鄆州坐糾察刑獄事不當也曹利用未敗時道輔嘗言利用及上御藥羅崇勲竊弄威權宜早斥去以清朝廷立對移刻太后

可其言乃退利用既被譴死而崇勲固在云

本傳云道輔除左正

言受命日論奏樞密使曹利用上御藥羅崇勲竊弄威柄宜早斥去以清朝廷立對移刻太后可其言乃退利用既被譴死而崇勲固在云

道輔為左正言乃天聖元年八月此時利用及崇勲驕恣之狀猶未著道輔必不以受命日首論此二人及五年十二月遷左司諫或可論矣然距利用貶絀尚一年餘遽云太后

可其言亦妄矣且利用不應與崇勲同論

或道輔果曾同論二人亦必不在始受命日傳蓋誤也
今畧加刪潤附道輔知鄆州後道輔出守未必不由論
崇勲故
耳當考
先是有越黃河者十數人繫鄆州獄吏白罪

當徒道輔皆釋之因曰異時河決南燕至于鄆故有禁
今河水復故道為乾河何禁也

此據附傳
正傳削去

河朔罹水患朝廷以民疲不任繇率故王楚埽尚未塞
都大巡護澶滑河隄高繼密請自澶州嵬固埽下接大
隄東北即高阜築遙堤為備禦計侍御史高弁又請于
澶州之西分導二河以殺水勢壬子命龍圖閣待制韓

億左藏庫使閻文應等往河北同轉運使相視之 詔
自今中書轉補錄事以上職名更不依名次並擇廉謹
有行止明曉公事者充填仍召近上職名二人委保如
犯正枉法贓罪並當連坐 先是開封府界提點諸縣
公事張應物言諸縣酒務多為豪民買撲坐取厚利自
今請差官監榷仍委三司保舉從之時天禧四年也乾
興中罷舉官天聖四年應物復以為請乃詔依前舉官
是歲上封者又言諸縣課額多虧蓋監臨之官皆是保

舉多相庇匿不言自今請止委審官三班院差人監當
自是遂罷府界舉官之制 天下上戶部主戶六百萬
九千八百九十六口二十三萬一千九百二十六客戶
四百五十五萬二千七百九十三口六百二萬二千三
百一十二

--	--	--	--	--	--	--	--

欽定四庫全書

續資治通鑑長編卷一百九

宋 李燾 撰

仁宗

天聖八年春正月己未契丹遣左監門衛上將軍耶律忠禮部郎中知制誥陳遼來賀長寧節

癸亥詔河北轉運使視澶州埽岸如梢芟有備即議修塞或民力猶困則須冬月乃議之

丙寅命資政殿學士晏殊權知禮部貢舉 賜定州修城役卒緡錢

壬申詔嘗舉人為京官而止改幕職及循資後或犯罪舉主並減同罪一等 太常少卿知廣州狄棐加直昭文館棐代還不以南海物自隨人稱其廉

甲戌真定府定州路都部署彰武節度使贈侍中謚武穆曹瑋卒瑋用士得死力平居意氣舒暇及行師多奇計出入神速一日張樂飲僚吏中坐失瑋所之明旦徐

出視事數馘庭下嘗稱疾加砭艾卧閣會賊大至瑋奮起裹創被甲跨馬賊見駭奔將兵幾四十年未嘗少失利自三都之捷威震西域嘉勒斯賚每聞瑋名即望瑋所出東嚮合手加顙契丹使過天雄部勒其下曰曹公在此毋縱騎馳驅也真宗重兵事凡邊奏必手詔詰難至十數反而瑋守初議卒無以奪後雖他將有論邊事者往往密付瑋處之渭州有告戍卒叛入夏國者瑋方對客奕碁遽曰吾使之行也夏人聞之即斬叛者投其首

境上羌殺邊民入羊馬贖其死下令曰羌自相犯從其俗犯邊民者論如律自是無敢犯環慶熟羌田多為人所市致單弱不能自存因沒虜中瑋盡令還其故田後有犯者遷其家內地所募弓箭手使馳射較強弱勝者予田二頃再更秋熟課市一馬馬必勝甲然後官籍之則加田五十畝至三百人以上團為一指揮要害處為築堡使自塹其地為方田環之立馬社一馬死衆出錢市馬屬羌降者既多因署其首領為軍主或指揮使或

副指揮使使統其族帳止于本軍敘進以其習知虜情
與地利不可徙他軍也開邊壕率令深廣丈五尺山險
不可塹者因其峭絕治之使足以限虜後皆以為法山
東知名士賈同嘗造瑋客外舍瑋欲按邊即同舍邀與
俱同問從兵安在曰已具既出就騎見甲士三千列立
人音不徹舍同歸語人曰瑋殆名將也瑋為將不如其
父寬然自成一家賈同臨淄人初名罔字公疎著山東
野錄七篇年四十餘同進士出身時大中祥符四年也

真宗命改今名王欽若方貴盛聞同名欲致之固謝不
往居八九年始調歷城主簿張知白薦為大理評事通
判兗州綿州天聖初上書言自祥符已來諫諍路塞丁
謂乘間造符瑞以欺先帝今謂姦既白宜明告天下正
符瑞之謬罷宮觀崇奉歸不急之衛兵收無名之實費
使先帝免後世議國家無因循之失又言寇準忠規亮
節疾惡擯邪自其貶黜天下之人弗見其罪宜還之內
地以明忠邪善惡之分時太后臨朝而同言如此人以

為難再遷殿中丞知棣州卒

措置藩校已見祥符七年四月甲戌此當削去或兩

存之亦可

內殿崇班張繼恩遭父喪請給假下太常禮院言齊斬三年並解官後唐應順元年敕內諸司使副帶東西班正官及供奉官殿直承旨卒哭舉追今武臣例不解官又無給假日限乙亥詔武臣父母喪卒哭聽朝叅

丙子前良山縣令陳曜請于鄆滑州界疏黃河入麋邱河赤河以分水勢詔京東河北轉運使與韓億等同規

度之

戊寅遣禮賓副使江德源往澶州視古遙堤

庚辰詔河北水災州軍募人入粟以賑貧民

辛巳作三聖宮于永安縣訾王山仍更山名曰鳳臺

殿中侍御史張存言比部員外郎知開封縣劉汀知祥符縣李宗簡各緣門地遂厠郎曹魯乏譽于中材猥庇身于大邑欲乞自今開封兩赤知縣依舊差館殿無職及立朝知名者充自餘常流不在除授詔劉汀李宗簡候

成資替

劉汀李宗簡未見

集賢校理彭乘以親在蜀懇求便

官詔乘知普州蜀人得鄉郡自乘始普鮮知學者乘為

興學召其子弟為生員教育之俗遂變

此因乘遷校理附見知普州事

不必在此月也

詔諸道守任臣僚無得非時聚會飲燕以妨

公務及假借民戶什器轉運司謹察其轉運使副巡歷

所至除遇公筵方得赴坐

會要八年正月詔

二月戊子詔五代時官三品以上告身存者子孫聽用

蔭仍須得保官三人復置韶州樂昌縣銀鉛場

庚寅置彭州九隴縣采金場

明道元年正月己丑
高觀責官可參考

丙申上封者言自今選補僧官須經四十臘二十夏以上仍設六科考試詔開封府下左右街具奏以聞而卒無應格者乃命次補如舊

乙巳詔文武官當磨勘而隱落公罪者以違制失論賊私罪以違制論公罪徒以上情重者仍聽奏裁先是右班殿直張從恩當磨勘而隱落公罪杖坐徒二年追兩官勒停上以所坐太重特免追官而更著此條

三月庚申詔選人因避親成資放罷者許令叅選

甲子御崇政殿試禮部奏名進士丙寅試諸科丁卯賜進士王拱壽等二百人及第四十九人同出身已巳賜諸科及第同出身者又五百七十三人拱壽咸平人也詔更其名曰拱辰 詔應制科自今聽隨禮部貢舉施行 廢鄭州新開索河斗門

壬申幸後苑賞花釣魚觀唐明皇山水字石于清輝殿命從官皆賦詩遂燕太清樓每歲賞花釣魚所賦詩或

預備及是出不意坐多窘者優人以為戲左右皆大笑
翌日盡取詩付中書第其優劣度支員外郎祕閣校理
韓義所賦獨鄙惡落職降司封員外郎同判冀州

乙亥詔宗室嫁女擇士族之有行義者敢以財冒為婚
御史臺街司察舉之

己卯鹽鐵副使兵部郎中張若谷為右諫議大夫知并
州先是麟府歲以繒錦市蕃部馬前守輒罷之若谷以
謂互市所以利戎落而通變情且中國得戰馬亟罷之

則猜阻不安奏復市如故而馬入歲增

合見前
守姓名

度支

副使刑部郎中唐肅為龍圖閣待制肅清直廉儉於仕
進恬如也在度支會官糴麥京師數且足有豪姓欲入
官者以數十萬石因權幸干掖庭太后面命肅肅曰麥
貯於倉率不過二歲多則朽腐不可食况撓法耶卒不
受嘗得知洪州艤舟南康不即赴或問之肅曰職田以
四月為限今遽往得無趨利之譏乎踰月乃上

肅不受
豪姓麥

正傳削去今追載之不知正傳何故也肅
與鍾離瑾梅詢三人者共拜今但記肅

庚辰詔河北被水州縣毋稅牛 先是諸州軍遣承引

官客司衙前赴三司補軍大將者例免里正之役詔自

今罷勿遣 三司言方建太一宮及洪福等院計須材

木九萬四千餘條乞下陝西市之詔可通判河中府范

仲淹言昭應壽寧天戒不遠今復侈土木破民產非所

以順人心合天意也宜罷修寺觀減定常歲市木之數

蠲除積負以彰聖治尋徙陳州又言恩倖多以内降除

官非太平之政願以上官賀婁為戒事雖不行上以仲

淹為忠

諫買木據仲淹奏議乃天聖八年三月末事願以上官賀妻為戒據富弼墓誌在徙陳州後正

傳即係之河中府誤也

夏四月癸未朔復中書舍人宋綬翰林學士綬前以昭應宮災落學士綬時同修國史詔免赴舍人院當直于是復入翰林

癸巳契丹遣左千牛衛上將軍耶律育都官郎中知制誥吳克荷來賀乾元節

甲午徙京西轉運使工部郎中王彬為河北轉運使部

吏馬崇正太后姻家滑橫不法彬發其贓罪下吏忤太

后意復徙京東

徙京東未得
其時附見

丙申禮部郎中知制誥徐與為翰林學士權知開封府
與俊邁有才然銳于進取在西掖幾四年未遷乃由內
降入翰林領開封時議薄之不半載暴卒

辛亥武勝軍節度使同平章事判許州錢惟演來朝惟
演以疾求赴京師也

五月甲寅賜信州龍虎山漢天師張道陵二十五世孫

乾曜號虛靖先生

按宋史本紀賜號澄素先生

以其孫見素為試將

作監主簿仍令世襲先生號蠲其祖課

乙卯詔三班使臣本文吏子孫年二十五以上許量試筆札讀律與換文資

丙辰大雷電

戊午詔審官院京朝官任廣南西川而當遷官者文字已至院雖罷任亦許磨勘以聞先是太子中舍知大寧監尹仲宣自陳改官自去秋已滿三年雖齋闋闕上有

司于今不報如此則遠方官吏俟代乃得考校常引歲月與詔限不相應因下此詔

己未選諸州鼓角匠置武嚴指揮隸太常

辛酉御崇政殿錄繫囚

六月癸未朔命內侍右班都知楊守珍試武舉人弓馬于軍器庫

癸巳監修國史呂夷簡等新修國史於崇政殿初太祖太宗正史帝紀六志五十傳五十九凡一百二十卷至

是修真宗史成增紀為十志為六十傳為八十總百五十卷故事史成由監修而下皆進秩而夷簡固辭之甲午修國史夏竦同修國史宋綬馮元編修官王舉正謝絳李淑黃鑑管勾內臣韓守英承受藍元用羅崇勳撰書皇甫繼明並遷官職龍圖閣待制馬季良專督三司應報文字亦賜勲一轉又各賜衣物有差鑑浦城人也初真宗以京師刑獄多滯寃置糾察司而御史臺詔獄亦移報之于是御史言其非體乃詔御史臺獄自今

勿復關糾察司

乙巳御崇政殿試書判拔萃科及武舉人戊申以書判拔萃人宣州司理參軍曲江余靖為將作監丞知海陽縣安德節度推官河南尹洙為武勝節度掌書記知河陽縣武舉人張建侯等十二人補三班奉職借職差使殿侍詔禮部貢院治尚書周易二經者自今皆分場考試明法以七同以上為合格時言者謂書易本兩科先朝并為一每經各問義五道舉人或偏習一經對及

五同已為合格又明法科所對止取六同書少而易習
請益以一經故更定之 賜和州刺史劉從德敕書獎
諭從德知衛州辟屯田員外郎戴融為同判融楚人善
諂佞因率州人以千數妄言治有異狀乞刻碑記之朝
廷雖不許以太后故猶降褒詔從德美之子也縣吏李
熙輔者善事從德乃薦熙輔于朝太后喜曰兒能薦士
知所以為政矣即日擢熙輔京官從事河南鄭驤因緣
從德亦擢美官時監司以太后故多假借從德獨轉運

使王立按舉無所容

秋七月丙辰詔以冬至有事於南郊

丁巳詔修史官修國朝會要

慶歷四年四月成書

戊辰羣臣請上皇帝尊號曰聖文睿武體天欽道仁明
孝德上皇太后尊號曰應元崇德顯功隆運仁壽慈聖
皆不許表三上卒不許又手詔賜輔臣備述謙慙之意
癸酉以鹽鐵判官兵部員外郎直史館張宗象為契丹
后生辰使香藥庫使李渭副之宗象侖子也

乙亥命翰林學士宋綬馮元為初考制策官翰林學士
章得象御史中丞王隨覆考知制誥石中立鹽鐵副使
鞠詠編排自是御試制科人率如此例

丙子御崇政殿策試賢良方正能直言極諫太常博士
成都何詠茂才異等富弼詠弼所對策並入第四等丁
丑以詠為祠部員外郎同判永興軍賜五品服弼為將
作監丞知長水縣

詠邑里據登
科記當考

詔開封府曹官取選

人歷任四考以上方揀選舉奏

八月丙戌詔翰林學士盛度御史中丞王隨與三司詳定陝西兩池鹽法

丁亥召近臣及宗室觀三聖御書于龍圖天章閣又觀瑞穀於元真殿從臣賦詩賜御飛白字各一軸遂宴藥珠殿

戊子詔流人道死其妻子願還鄉里者所在給食送之其不當還者勿遣

癸巳資政殿學士晏殊言唐明經並試策問參其所習

以較才識短長今諸科專取記誦非取士之意也請終場試策一篇詔近臣議可否咸以諸科非素習其議遂寢

戊戌詔京朝官自今得替前轉官已及三年者與磨勘其任川廣替至闕而及三年者亦許之未及者候次任滿三年

庚子中書言近制知縣入通判通判入知州不以有無過犯並三任其有五人保舉者減一任然則三任而無

過乃與有過者無異徒長奔競之風請自今更不用舉
主皆兩任而陞改之其有私罪及三犯公罪若徒以上
仍舊三任從之

癸卯以知滑州太常少卿集賢殿修撰李若谷為右諫
議大夫知延州州有東西二城夾河夏秋水漲岸屢崩
費役不可勝乃制石版為岸押以巨木後雖暴水不壞
官倉據山而貯穀少患瓦木乏無以增廣若谷令依山
作土國國可貯二萬斛後他郡多倣之

此不必載若谷
初除月日附見

也可

甲辰詔葺并州平晉縣回鑾寺

丙午詔長寧節賜百官衣

丁未徙判許州武勝節度使同平章事錢惟演判陳州
知江寧府刑部尚書張士遜知許州

戊申工部郎中龍圖閣待制梅詢為契丹生辰使供備
庫副使王令傑副之度支員外郎祕閣校理戶部勾院
王夷簡為契丹正旦使西染院使竇處約副之開封府

判官侍御史張億為契丹后正旦使禮賓副使張士宣

副之

處約冠氏人元
賓子舜卿父

九月壬子詔長寧節天下建置道場及賜燕並如乾元
節其貢物留本處止奉表附驛以聞

癸丑復置諸路提點刑獄官仍令所至毋得送迎其吏
人約舊數裁減之不十日又廢不行

丙辰罷百官轉對言事者頗衆大臣不悅也故復罷之
乙丑樞密副使給事中姜遵卒始病車駕臨視賜白金

三千兩及卒又臨奠之輟一日朝贈吏部侍郎

劉美家婢出入禁中大招權利樞密直學士刑部侍郎
趙稹厚結之已已擢稹為樞密副使命未出人馳告稹
稹問東頭西頭蓋意在中書世傳以為笑

癸酉河北轉運使給事中胡則權三司使侍御史知雜
事鞠詠言則丁謂之黨性貪污不可復以利權任之不
聽

丙子賜臨江軍玉笥山人朱旦號善濟處士仍授其子

煥本軍助教旦以醫術得召見故也祠部員外郎直集賢院通判河南府謝絳雖在外數論事嘗奏近歲不逞之徒託言數術以先生處士自名禿巾短褐內結權倖外走州邑甚者矯誣詔書傲忽官吏請嚴禁止先以墨敕賜封號者追還之

絳言不得其時
附朱旦後當考

冬十月壬辰奉安太祖御容于太平興國寺開元殿陝西解州解縣安邑兩池歲為鹽百五十二萬六千四百二十九石五十斤以席計為六十五萬五千一百二

十席席百六十斤初以給京師及西京南京京東之充
鄆曹濟濮單廣濟京西之滑鄭潁陳汝許孟陝西之河
中陝解虢慶成河東之晉絳慈隰淮南之宿亳河北之
懷衛及澶州諸縣之在河南者總府州軍二十八皆官
役鄉戶衙前及民夫謂之貼頭水陸漕運禁人私鬻京
西之襄鄧蔡隋唐金商房均郢光化信陽陝西之京兆
鳳翔同華耀乾涇原邠寧儀渭廊坊丹延環慶秦隴鳳
階成保安鎮戎及澶州諸縣之在河北者總府州軍三

十七聽商賈販鬻官收其筭并邊秦延環慶渭原保安
鎮戎德順九州軍又募人入中芻粟償以鹽凡通商州
軍在京西者為南鹽在陝西者為西鹽若禁鹽地則為
東鹽各有經界防其越逸而三京二十八州軍官自輦
鹽百姓困於轉輸頗受其弊有上書言縣官榷鹽得利
微而為害博兩池積鹽為阜其上生木合抱數莫可較
請通商平估以售少寬百姓之力乃詔盛度王隨議更
其制度隨與權三司使胡則盡通商五利上之曰方禁

商時官伐木造船以給輦運而兵力罷勞不堪其命今
無復其弊一利也始以陸運既差貼頭又役車戶貧人
懼役連歲逋逃今悉罷之二利也又船運河流有沉溺
之患綱吏侵盜雜以泥砂硝石其味苦惡疾生重脰今
皆得食真鹽三利也國之錢幣謂之貨泉蓋欲使之通
流而富室大家多藏鏹不出故民用益蹙今得商人六
十餘萬頗助經費四利也歲減鹽官兵卒畦夫傭作之
給五利也丙申詔曰池鹽之利民食所資申命近臣詳

立寬制特弛煩禁以惠黎元其罷三京二十八州軍榷
法聽商賈入錢若金銀京師榷貨務受鹽兩池

此據
本志

或

云上書者王景也景嘗言池鹽之利唐代以來幾半天
下之賦太宗時法令嚴峻民不敢私煮煉官鹽大售真
宗務緩刑罰寬聚歛私鹽益多官鹽日虧景時為選人
始建通商之策大臣咸言其不便太后力欲行之謂大
臣曰聞外間多苦鹽惡信否對曰惟御膳及宮中鹽善
爾外間皆食土鹽太后曰不然御膳多土不可食或議

通商何如大臣皆以為如是則縣官必多所耗太后曰
雖棄數千萬亦可耗之何害大臣乃不敢復言故命盛
度等與三司詳定利害卒行景策詔下蒲解之民皆作
感聖恩齋此據司馬光記聞自是雖商賈流行而歲課之入官
者耗矣此據實錄

丁酉占城國遣使來貢方物

己亥以內殿崇班閤門祗候趙振子珣瑜並為三班借
職珣瑜善騎射舞鐵鞭召試崇政殿以其材勇絕人特

錄之

壬寅置天章閣待制位龍圖閣待制之下命鹽鐵副使
禮部員外郎鞠詠兼侍御史知雜事權判吏部流內銓
范諷為之

癸卯以兵部郎中龍圖閣待制韓億為樞密直學士知
益州代程琳也琳在益州上元張燈州人夜聚遨遊琳
先戒火備曰有火則隨救之勿以白已而果有火終燕
人無知者或告振武軍變琳曰軍中動靜我自知之苟

有謀不待告也蜀民歲為社祠灌口神有妖人自名李
冰神子置官屬吏卒聚徒百餘琳捕其首斬之而配其
社人于內地道路或以為冤事聞朝廷遣內侍張懷德
馳視懷德視蜀既無事還奏得解益州故事歲出官粟
六萬石糶貧民億至會歲大旱令先期倍數出粟予民
又疏九昇江口溉田數千頃億明年四月乃到益州出粟疏江今附見 詔
三班使臣監當一任回別無遺闕並依舊條却與監押
巡檢差遣所有天聖六年正月敕勿行 權判流內銓

王隨言在京文武臣僚奏舉幕職州縣官充京官奏狀多無印記難辨真偽欲乞今後舉官並用舊條奏狀年月邊貼黃明言使其處印其貼黃亦須用印記方許于閣門投進所貴久遠有憑從之

十一月乙卯西上閣門副使勾當翰林司郭承祐除名配岳州衙前編管父比部員外郎世隆特勒停承祐從義曾孫娶舒王元偁女坐盜御酒及用上方金器法當死特貸之世隆亦嘗受所盜物也

戊午邛部川都蠻王黎在遣卑郎離滅等來貢方物

丙寅朝饗景靈宮

丁卯饗太廟

戊辰合祀天地于圜丘大赦賀皇太后于會慶殿戚里有毆妻致死更赦事發者太后怒曰夫婦齊體奈何毆致死耶權知開封府寇瑊對曰傷居限外事在赦前有司不敢亂天下法卒免死

十二月癸未加恩百官

庚寅給江寧府學田十頃從張士遜之請也

辛卯詔京朝官自今陳乞移替者其磨勘轉官無得以在任歲月并計之

壬辰以雷州司戶參軍丁謂為道州司戶參軍始南郊肆赦中外疑謂必將內徙刑部員外郎兼侍御史知雜事劉隨言彼擅移于陵域將不利于君親只合取彼頭顱置諸郊廟殿中侍御史張錫言謂姦邪弄國罪當死無可憐且大臣竄逐本與天下棄之今復還是違天下

意由是止徙道州

張唐英政要云劉隨以諫官論丁謂本傳亦具載于未出知齊州已前蓋

誤也隨罷諫官踰年矣今年十月乃由起居郎為負外
兼知雜御史歐陽修誌張錫墓云錫以監察御史論

丁謂本傳因之不知錫七年七月已遷殿中侍御史矣

權知高麗國事王珣遣

御事民官侍郎元穎等來貢方物

乙未詔長寧節百官上壽于崇政殿初上謂輔臣曰昨

郊禮畢朕嘗率文武百官諸軍將校賀皇太后于會慶

殿明年長寧節宜定百官上壽儀下太常禮院議而太

后不欲御會慶乙未詔上壽于崇政殿既而復就會慶

辛丑詔翰林學士宋綬天章閣待制范諷以七年五月
庚午詔書考次國朝以來文武官之子孫合預推恩者
以聞其曾任中書樞密院及使相子並為校書郎或三
班奉職弟侄孫為試寺監主簿少卿監以上為太廟齋
郎節度使上將軍子為三班奉職餘為借職大將軍至
刺史以上子為借職餘為下班殿侍三班差使

推恩等
第在九

年五月今
并附此

癸卯契丹遣天德軍節度使蕭昭古引進使竇振來賀

皇太后正旦

甲辰遣啟聖軍節度使耶律元吉少府監崔潤來賀正旦

丁未定難節度使西平王趙德明遣使來獻馬七十匹乞賜佛經一藏從之 詔自今御史臺官并三司判官開封府推判官差出勘鞫公事或已請驛料外並依舊支與本職添支

